

INVENTAIRE LIBELLE,

piece 57 a

des pieces produittes.

PAR MESSIRE ANDRE VALLADIER
Docteur en Theologie, Protonotaire Apostolique,
Conseiller, Aumosnier & Predicateur ordinaire du
Roy, Abbé de S. Arnoul de Metz.

C O N T R E

*Les calumnies, & attentats de Maistre LaZare de Selue,
des Maghins pere & fils, & leurs Consors.*

A NOS SEIGNEURS DE LA
seconde Chambre des Enquestes.

1 **M**aitre de Selue estoit commis cy deuant entre les
soldats seulement de la garnison, & les Citoyens
pour la iustice Royale en la ville de Metz. Il ap-
pert par ses lettres d'institution cy ioinctes, & par
les patentes & arrests du Roy icy bas produittes

*1. piece.
Lettre de
son institu-
tion.
cotte S.*

cotte. F F.

2. Maghin Maistre Escheuin, chef des treze Iustice Regaliene
iadis de l'Euesque de Metz, donnee solennellement au Roy, par
les Euesques, que de Selue & Maghin ont iusques icy supprimee
à sa Maiesté.

*1. Cayer de
la souverai-
neté du
Roy à Metz
Cotte A.*

3. Le sieur de Bonnourier Capitaine d'une compagnie au Re-
giment des gardes, pour lors commandant à Metz en l'absence de
Monsieur d'Espéron.

*Cinq pie-
ces.*

4. De Selue, & Maghin obstinez à ecclipser de tout leur pou-

Corro R. 1.

A



voir, l'autorité & souveraineté du Roy 1. pour muffer leurs mauuaises actions au Soleil de ce redoutable Parlement 2. pour le lucre, & pour ne perdre leur commerce, & se verifie par exemples iournalieres, qu'ils ont empesché par toute sorte de violences & rebellions, les appels au Roy, ce qui a esté la source principale, avec l'auuidité de de Selue, d'auoir pour son beau frere l'Abbaye de saint Arnoul, de cette longue tragedie, qu'ils ont fait retentir sur le Theatre de toute la Chrestienté, non seulement de la France, contre les biens, maisons, subiets, droits, reputation, & contre la personne, & la vie propre dudit Abbé.

5 De Selue contre les ordonnances du Royaume, se marie à la fille de Praillon le plus apparent des Treze de Metz: le sieur Bonnourier donne son nepueu nommé le sieur de Garges, en mariage à la sœur de la femme dudit de Selue, sœur aussi de Praillon le ieune l'un des Treze.

*Toutes les
pieces sui-
uantes.*

6 Le dessein de de Selue, est de faire vacquer l'Abbaye, ou par son infamie, ou par sa mort, & la donner a Praillon Prestre, & Chanoine frere de sa femme, & de la femme du sieur de Garges nepueu du sieur Bonnourier, si que on appelloit desia ledit Praillon à Metz, monsieur de saint Arnoul.

7 Les expedients, & les moyens pour y arriuer 1. les armes, & main-forte du sieur Bonnourier 2. le nom Royal de de Selue, 3. la bourse commune de la ville, & des Treze de Metz qui y ont employé contre luy plus de cent mille francs en ceste ville au conseil & ailleurs, 4. la rebellion de ses moynes qui leur auoient proms d'eslire Praillon, moyennant qu'on les supportast contre luy, & contre la reforme, & qu'on leur lascia l'œconomat & administration absolue de son Abbaye. 5. les conclusions tousiours prestes du Procureur Ioly.

CONTRE SES BIENS, ET SES DROICTS.

Dan 1609 1 Il fut enuoyé par election singuliere du Roy Henry le Grand l'an 1609. Vicaire General, grand penitencier Theologal, & Pre-
*Deux pie-*dicateur Royal en l'Euesché, & ville de Metz.
ces en ori-
ginal corre. 2 Eleu Abbé de S. Arnoul par postulation Canonique, suivant le concordat Germanique, par les moynes confirmee & aggree.
Incontinent par arrest contradictoire au Conseil du Roy, & le

brenet qu'il en auoit donné au sieur de Senneton cassé l'an mil six cens vnze le treziesme Septembre.

L'an 1617.

13. Septemb.

3 Pour toute brigue, il n'y eut que sa vie Religieuse & exemplaire, & les heureux succés de sa doctrine, qu'il auoit pleu à Dieu de prospérer à l'edification vniuerselle de tous les Catholiques, & en la conuersion d'un nombre notable des deuoyez, dont les Religieux avec lesquels il n'auoit aucune autre cognoissance, se porterent à le venir prendre en l'Euesché à la minuiet, luy dormant, pour le faire leur Abbé.

4 Son election enuoyée à Rome y est puissamment, mais sous main debatue trois ans durant par de Selue, empruntant le nom d'un grand son parent, bien que contre sa volonte & à son inscen, se seruant ledict de Selue de la facilité & conspiration de son secretaire pour renuerfer l'election.

5 Ils enuoyent deslors des memoires remplys d'impostures contre sa reputation, qu'ils firent presenter par deux faux freres à sa Sainteté. laquelle en presence de monsieur de Marquemont Archeuesque de Lyon, & de monsieur de Breues Ambassadeur, les rebroüa disant, qu'elle scauoit bien les qualitez, merites, & conuersation du sieur Valladier, & commanda sur le champ que les Bulles fussent expediees. Et deslors monsieur le Cardinal de Gyury, duquel il estoit domestique, tous les chefs de la citadelle, & garnison, mesme le sieur Bonnourier, & Maghin, la ville en corps, & les sieurs Treze, les seize, ou dixsept paroisses, les douze ou quinze maisons Religieuses, tant reformees qu'autres, tous tesmoins oculaires, enuoyerent de leur propre mouuement à Rome, & en cette cour des attestations solennelles icy iointes de sa vie, & conuersation Religieuse, & de ses deportemens irreprochables.

Un cayer

d'attesta-

tions cele-

bres cette

x

6 N'ayants peu resister à la force de l'arrest du Conseil du Roy, & du Concordat Germanique inuiolable confirmé & maintenu par tous nos Roys, on charge son Abbaye d'une pension de deux mille liures contre les saints Canons, les termes expres du Concordat Germanique, les Bulles, & Indults de plus de vingt Papes & les patentes de nos Roys depuis Charlemagne.

7 De Selue est estably Procureur, Agent, & solliciteur à Mets pour ladicte pension, & preste le domicile bien que sous le nom de son valler domestique, & sergent nommé Pistre: sous le bruit

commun, qu'il s'estoit accommodé de ladite pension pour sub-
venir à sa pauvreté, & misere domestique,

8 L'an 1613. le cinquiesme Nouembre, il obtient à Rome ses
Bulles, en prend possession sans aucune opposition l'an 1614. le
6. May, il s'oppose à la pension icy au Conseil, ou d'abbort elle
est trouuee pleine de nouuelleté preiudiciable aux droicts de la
Maiesté, & de son Abbaye, & nullement supportable.

L'an 1613.
5. Nonēbre
1614. le
sixiesme
May.

Vne piece
Arrest
original
cotte. A

9 Cependant subrepticement on tire vne commission pour fai-
sir pour ladite pension, tous les biens de l'Abbaye, laquelle il fait
casser au rapport de monsieur Mangot, obtint main-leuee des
deux tiers, l'autre demeurant cependant sayfi, iusques à la con-
currence de deux mille liures, c'est de Selue qui a charge à Metz
de la pourfuiure, de sayfir, & de solliciter l'affaire.

10 Ce fut pour lors l'an 1614. que de Selue & Maghin se iettent
à corps perdu à oppresser ledit Abbé, avec ses pauvres subiets, à
abolir tous ses droicts, à rauager ses seigneuries, à profaner de
toutes parts sa maison Abbatiale, l'une des plus Royales, antien-
nes, & Augustes de toute la Chrestienté de l'ordre de saint Be-
noist, & de fundation Royale.

Trois pieces
cotte F.

11 Il s'en vient pleindre au Roy, monsieur d'Esperson en prend
l'arbitrage, eux redoutans l'esclat, que leurs violentes actions dô-
roient au conseil de sa Maiesté: condamne leurs violences avec
tous despens, dommages & interests: ordonne que telles proce-
dures seront tirees de leurs registres, mais au lieu d'obeyr de Sel-
ue, Maghin, & leurs adherants plus qu'auparauant attaquent &
oppressent tout ce qui le concerne, sans aucune exception.

Plusieurs
pieces cotte
D

17. Iuin.

1 Pour remede, il oppose à leur violence, les patentes de garde
gardienne oſtroyees par les Roys, il y a mille ans à l'Abbé, & Ab-
baye de S. Arnoul, leurs donnant pour Iuges Saulue gardiens,
Vitry, ou Chaaalons, comme plus proches, confirmees par les Em-
pereurs, & par les Papes, les faict registrer, & publier au Greffe
dudit de Selue l'an 1614. le 17. du mois de Iuin. Demande au Roy
glorieusement regnant, confirmation de toutes les precedentes,
lequel en son Conseil veus, & considerez les originaux, les con-
firme toutes, & de plus, voyant les iniustes procedures faictes
contre luy pour les borner & preiuger, donne attribution de Iu-
risdiction, pour tout ce qui concernel'Abbé, & l'Abbaye de saint
Arnoul au Bailliage, & Presidial de Vitry en Feburier 1615.

Vne piece.
L'an 1615.
Feburier.

2 C'est

2 C'est icy ou de Selue, & Maghin, & leurs adherants perdent toute contenance, tout respect & fidelité, qu'ils doibuent au Roy, disent audit pleignant, luy font dire & publient à tous, que si il parle de ceste garde gardienne du Roy, ils le ruineront, & le perdront de fonds en comble, & se perdront plustost eux, leurs femmes & enfans, que de la souffrir.

3 Leur auidité au lucre, la crainte de se voir au iour du Parlement par appel de Vitry, le dessein de se rendre souuerains & exempts de la correction Royale, & d'estouffer sous ceste impunité leurs actions, & leurs procedures violentes, à l'oppression de tant d'innocents, les porterent à telle extremité, que de Selue refuse le registrement & publication desdites patentes de garde gardienne, suscite en bon seruiteur du Roy le scyndic de la ville à s'y opposer, voicy son iugement du 12. Nouembre 1615. Il faict plus.

4 Allant l'Abbé luy-mesme en personne accompagné de deux de ses Religieux, & six ou sept autres personnes qualifiees, & de Pinard sergent à verge au Chastellet de Paris, venu expres pour publier, & signifier lesdites patentes de Selue le reçoit avec iniures atroces, bien qu'Abbé sacré & mitré, & entrent en haulte cholere, le poulse deux & trois fois de la main, & le chasse ignominieusement de la chambre Presidialle paree de fleurs de lys, present le sieur Ioly Procureur du Roy, lequel aussi au lieu de tenir la main à faire obeyr le Roy a tousiours non seulement conuiué, ains porté toute assistance à son oppression, & à s'opposer sous le nom du Roy à l'autorité Royale, ainsi qu'il paroît par toutes les pieces produittes en cet Inuentaïre contre de Selue, les Maghins & leurs consorts, qui n'ont rien executé que sous l'aduen de Ioly Huguenot, partie reformelle dudit Valladier.

1. piece.
cotte f.

12. Nouëb.

Une piece
Cotte B.

Toutes les
pieces de
cet inuentaïre em-
ployees contre Ioly.

5 Sur le champ ils se iettent violemment à contreuenir à tous & chacuns les chefs desdites patentes de garde gardienne qu'ils violent, & profanent tous dans moins de huit iours subsequents, apres le refus du registrement d'icelles, & apres l'affront à luy fait dans la chambre Royale de Iustice, qui deuoit estre vng azyle, mesme à tous les plus estrangers pour la Iustice, & bien plus pour le maintien & seruice de la fleur de Lys.

6 En mesme temps dudit refus, il enuoye Pistre son sergent, & Neuf vallet desia infame, par reparation publiquement faite, pour si-

*Un origi-
nal de l'ar-
rest de
main-leuee
des deux
tiers.*

gnifier audit Abbé la saisie du tiers de tous ses reuenus, en vertu de la susdite commission, laquelle portoit saisie de tous ses biens signee Paulmier; non seulement surannée, mais cassée comme dit est, au Conseil du Roy, pour la pretendue pension de deux mille liures, & se porte ledit Pistre tout yure qu'il estoit, venant de s'en-yurer de la chambre d'un de ses moynes avec toute sorte d'insolence, iusques dedans sa chambre Abbatiale, qu'il tenoit à cause de son indisposition, bien qu'on n'ayt iamais veu à Metz, que les sergents entrent dedans les maisons des moindres Chanoines, ains s'adressans tousiours à leurs Procureurs, ou Recepueurs, que fut toute la responce qu'il luy fit, qu'il s'adressa à son Recepueur ou Procureur, & que sa saisie estoit nulle & faulse, & sur vne commission surannée, & cassée par arrest, & portant saisie de tous les biens.

*Sept pieces
cotte K.*

7 Pinard son sergent luy fait la mesme remonstrance avec retenue: mais pour rendre toutes ses significations, exploits & proces verbaux suspects & inutiles, de Selue, & Maghin suscitent ledit Pistre à presenter deux requestes, l'une contre l'Abbé se plaignant qu'il l'auoit appellé faulsaire, bien qu'il y eut grande differēce de dire que son exploit estoit faux, & de dire qu'il estoit faulsaire: l'autre requeste contre Pinard comme l'ayant iniurié, bien qu'il n'eust en rien excédé, toutes les deux en reparation d'iniure, & pour tous recors & tesmoignages, le tout sous le proces verbal de Pistre tout yure qu'il estoit, & comme dit est infame, & seul partie formelle en toute ceste procedure.

*Toutes les
susdites
pieces en-
ployees cotte
L. I. cotte
K.*

8 De Selue pour pallier sa passion, fait sous main que les deux Requestes se presentent au sieur Bonnouurier qualifié comme cy dessus, lequel en Roy, & d'autorité souueraine, en attribué toute iurisdiction à de Selue, & les luy renuoye, vn simple Capitaine au regiment des gardes, à quoy on employe toutes les pieces susdites, cotte L. I. & cotte K.

Idem.

9 Pinard est adiourné personnellement, ouy de sa bouche, detenu prisonnier & relasché sous caution, prise de corps contre luy decernée, en fin condamné à faire reparation honorable à Pistre pleine d'infamie aux despens, & à l'amende, montans à plus de trois cens liures qu'il a fallu payer audit Abbé, bien que ce ne fut de son fait, encore qu'à son occasion, & de la garde-gardienne du Roy.

10 Luy aussi Abbé eminent en sa ville de Mets, assigné, contumacé, condamné à reparation par de Selue enuers cet infame à l'amende, & aux despens le 3. Decembre de l'année susdite 1615. & sous ce iugement couuerte la conspiration contre sa vie dont se parlera cy apres, tendent à l'attraper, & ainsi suffoquer ses iustes plaintes, & la honte de leurs infames procedures, sous cette clause, inseree aux iugements pour Pistre, & autres par apres.

L'an 1615.
3. Decemb.

Ordonnons que ledit Arrest sera executé, reellement & de faict selon sa forme & teneur, nonobstant oppositions ou appellations quelconques, & à appeler ce faire sera ledit sieur Valladier contrainct par toutes voyes deuës, & Arrests raisonnables, MESME PAR EMPRISONNEMENT DE SA PERSONNE.

De Selue
Arrests
ses sentées
Rurales.

11 Coup sur coup, & en mesme iour, il viole & profane ses cloistres, & son autorité reguliere, & Abbatiale, il auoit trouué sa maison en si pitoyable estat, que c'estoit plustost vne infame retraite de toute desbauche qu'une maison Religieuse: & que les Religieux bien que de l'Ordre de saint Benoit, ne faisoient aucune autre profession que de prendre l'habit de boire, & excéder en toute sorte d'excès. Il ferme & mure les portes suspectes, établit des portiers, interdit l'entree à toutes femmes, commence à regler les yurongneries, festins, & lasciuës dissolutions de ses moynes: les assemble en plein chapitre: exhorte les anciens de faire profession de la regle de saint Benoit, & de viure conformément à icelle à son exemple: & pour les nouices, que resoluement ils feroient profession de la Regle, où se retireroient à leurs maisons paternelles: si commanda sur le champ au plus vieux Nouice nommé Marquant aagé de 22. a 23. ans, & qui auoit mangé plus de huit ans durant du pain de la maison, qu'il eut à faire profession, ou se retirer chez ses parens: à quoy luy ayant esté respondu capitulairement, qu'ils ne scauoient que c'estoit que la Regle de S. Benoit, & qu'ils n'en vouloyent rien scauoir, qu'ils ne souffriroyent que les portes de l'Abbaye feussent autrement fermées qu'à l'accoustumée, ny que Marquant ou autre nouice fissent autre profession que celle qu'ils auoyent faict. Il ne fit autre responce, sinon qu'il vseroit de son autorité Abbatiale, s'ils se trouuoient greuez de luy, qu'ils auoyent le Iuge commun à scauoir le S. Siege, loisible à eux des'y prouoir. Cependât deffenses au Prieur Cloistral, & à tous les Religieux d'admettre à l'Eglise, ou au reffectoire le nouice Marquant, qu'il n'eut

9. Pièces
cette N.

obey, & fait profession fuyuant sa volonté.

12 Si faut prendre garde, que sortant du Chapitre pour aller avec tous les Religieux à l'Eglise Cathedrale en general, *Te Deum laudamus*, qui s'y deuoit chanter pour la nouuelle de la santé recupee de monsieur d'Espernon, qu'on auoit auparauant tenu pour mort, les moynes pressans insolemment, & repliquants les susdites responses, il leur reïterat par deux ou trois fois, *Qu'il estoit Abbé maintenant*, *Que maintenant il estoit Abbé*: qu'il se scauroit faire obeyr: surquoy les moynes bientoist apres, presterent le faux tesmoignage à de Selue, qu'il auoit vsé de telles paroles, comme par allegresse au iour de la nouuelle de la mort de mondit sieur d'Espernon, & allerent briser & enfoncer les portes cloistrieres, lesquelles faisoient le plus d'obstacle à leurs sales entreprises. Et qui se souuiendra des faux tesmoignages, & sanguinaires conspirations des Humiliats Religieux dissolus contre S. Charles Borromeë, qui vouloit les reformer iusques à l'arquebuser en son oratoire, il en treuuera icy vn petit abbrege, & vn parallele remarquable.

13 De Selue donc embrasse l'occasion du degoust de ses Moines, & s'esuertuë de gaigner leur reuolte pour faire nouuelle election de son frere le Chanoine Praillon, comme ils luy en donnerent parole peu apres: suscite Marquant Nouice à presenter requeste tant à son nom que de tous les moynes, au Sieur Bonnouurier pleine d'atroces iniures, & impostures contre luy son Supérieur, & Abbé: Bonnouurier en Roy, & plus que souuerain la renuoye à de Selue & l'en declare Iuge cōpetent: il l'assigne & le presse sur son silence par sentence qu'il appelle arrest du 3. Decembre 1615. de Selue le contumace, le condamne à l'amende, & aux despēs: & bien dauantage à laisser son Nouice en son libertinage: encore plus luy ayant interdit le Refectoire; à luy payer pension de vingt cinq liures par mois pour estudier, bien que la mense des Moines & Nouices soit separee de la mense Abbatiale: faisant ledit de Selue en ce seul cas du Pape, du Roy, de l'Abbé, du Iuge, del'ennemy, du corriual, & competeur, & de partie formelle ensemble. Lequel Marquāt Nouice voyant le precipice où luy & ses confreres s'estoient precipitez, & bien qu'il se fust qualifié Profez en sa plaincte Apostata dedans l'an, ietta le froc aux orties, renonçant au benefice du iugemēt de de Selue, & est maintenant

Curé

*Vne piece.
L'extraict
Volant des
pretendues
informa-
tions, cote*

x

L'an 1615.

*3. Decem-
bre.*

*4. Pieces
cote O.*

Curé de S. Sebastien parroisse de la Ville-neufue de Nancy.

14 Presque à mesme heure à la chaude, le 13. Nouembre de Selue sous-main, & Bónouurier ouuertement enuoient audict plaignant, Cornier soy disant Preuost des Mareschaux de tout temps recogneu rebelle au Parlement, & aux volonte de Roy accompagné de deux, ou trois de ses Archers, luy estant a table en compagnie de douze, ou quinze, ou Abbez, ou Chanoines, ou autres des premiers & plus apparens de la ville de Mets, le somme de la part dudit sieur Bónouurier de declarer quel Iuge il vouloit recognoistre pour le regard de Marquant Nouice en la ville de Mets: à quoy il ne respondit autre, *sinon qu'il estoit le seul Iuge du* 8. pieces
cotte N. 1.
Nouice, & dessus luy nostre saint Pere le Pape, duquel il dependoit immediatement & le Roy souuerain Protecteur, sauuegardien, & fondateur de l'Abbaye de saint Arnoul, & partant le sieur Bonnourier & tous ceux qui representoient sa Maiesté en la Ville de Mets, desquels il auoit plustost a esperer protection, qu'oppression, conformément aux patentes de garde gardienne de nos Roys plus de mille ans en ça, & quant au sieur de Selue qu'il n'estoit, & ne pouuoit iamais estre son Iuge.

15 Cornier sur sa responce dresse vn procez verbal, sous le faux *Idem.*
tesmoignage de ses Archers appostez contraire à la verité de ce qui s'estoit passé: Entre autres que le pleignant auoit iniurié de Selue, & recongeu le sieur Bonnourier pour son Iuge: lequel procez verbal à luy présenté par ledict Bonnourier present le Sergent Maieur & deux Capitaines du Regiment des gardes sur sa responce qu'il estoit conceu contre toute verité, & composé d'euidentes impostures, en ce qu'il auoit dit que le procez verbal estoit remply d'impostures, & faux entendre: Cornier presente Requête à Bonnourier en reparation d'iniures, il la decrete en Roy, & souuerainement: la renuoye à de Selue, bien heureux de trouuer ce nouveau allegement à sa passion. Il assigne ledit Abbé, le cõtumace, le condamne enuers Cornier à reparation à l'amende & aux despens, le 15. du mois de Decembre l'an 1615. le tout L'an 1615.
le 15. Dec.
comme dessus par emprisonnement de sa personne.

16 Il ne manquoit plus à de Selue qu'un pretexte de pieté pour renuoyer le pillage de sa maison Abbattiale, avec tous les despens dommages, & interets à la bourse des pauures, à l'exclusion de la sienne: Il s'estoit fait le chef, & modérateur d'un certain bureau, conceu sous le nom des pauures, mais en effect d'ou s'engrais-



*6. Pieces
cotte P.
Estat des
aumosnes
ordinaires
quel Abbé
faict à S.
Arnoul.* sent les riches ; & d'ou de Selue a souuent emprunté des notables sommes, l'Abbé s'y estoit desia taxé volontairement à 2. liures par sepmaine, outre que chaque sepmaine sans māquer en pain, vin, & argent il en donoit d'ordinaire par regle par luy establie à vnze ou douze maisons Religieuses, ou au grand Hospital, si honnestement, qu'il en estoit & en est encore à plus de deux cens escus par an: sans compter quel'Aumosnier de son Abbaye est chargé des aumosnes: & pource en a de fort beaux reuenus à ce destinez par les fondateurs, suiuant la Regle de Saint Benoit. De Selue non content de ce soubz pretexte de religion & humanité se ioignant deux, ou trois du Clergé, ennemys de tout temps du compleignāt le faict taxer de nouueau d'autorité souueraine, luy absent, & du depuis formellemēt opposant pour son Bureau des pauvres, à autres six liures par sepmaine, outre les deux liures qu'il en bailloit volontairement. Taxe enorme contraire aux Bulles de plus de trente Papes, aux Patentés de plus de vingt Roys, & Empereurs, à la Regle de saint Benoit, aux saints Canons, & aux testamens, & fondations sacrees des fondateurs, & à la raison.

Jdem. 17 Il appelle contre ces particuliers du Clergé, & le President des pauvres, au saint Siege de cette Taxe iniuste, & tortionnaire: les y cite & contumace: ils n'y veulent respondre, bien que soubz le Concordat Germanique, & en terre d'obeyssance, en tous autres cas iusques icy, au sceu, au gré, mesme par confirmation de tous nos Roys: il y obtient defences en la rote de passer outre à ladiete taxe sur peine d'excommunication: De Selue en appelle comme d'abus, & quitte son abus au croc. Cependant les autheurs *cotte P. 2.* mesme de la taxe pretendue, la reuoquent & abandonnent pour tous horsmis pour le regard de l'Abbé de S. Arnoul qui en demeure encore oppresse, & pillé par les intédans dudiēt Bureau: suppliant la Cour d'y pouruoir ainsi qu'elle trouuera estre de Iustice, & les condamner avec de Selue à rendre ce qu'ils en ont ja receu & à tous despens, dommages & interests.

*7. Pieces
cotte L.* 18 Sur son refus, son opposition, son appel, & les Anathemes de Selue & Maghin d'autorité, pour colorer leurs autres attentats, sur les arretages de la pretenduē taxe pouuans monter deslors à quelque 30. ou 40. liures, & sur les susdites pretenduēs amēdes, & despens de Pistre, de Marquant, & de Cornier, qui ne pouuoiet arriuer qu'à trois, ou quatre cents liures, faisant yn pot pour-

ry de tous ces beaux tiltres, enuoye à mesme heure le 4. du mois de Decembre l'an 1615. en sa maison Abbatialle quatre-vingts, ou cent Sergents, Huissiers, ou recors armez de pistolets, & autres armes pendant la grand Messe, pour l'apprehender au corps, & le traïner au Parquet de de Selue, & de là, ainsi qu'on fera voir à la Cour, à la Cause funeste, & meurtriere mais iusques icy secrette pour luy raur la vie. Ledit Abbé oppose à cette bande les portes sacrees de son Eglise, & de sa maison, qu'ils brisent, attachent les Pannonceaux Royaux qui y auoient esté attachez d'ancienneté il y a plus de soixante ans, crime de Maïesté, pour abolir l'autorité du Roy, sur l'Abbaye de saint Arnoul de fondation Royale: sur les larmes, & cris lamentables de ses domestiques opposants, & reclamants les pannonceaux, & gardes gardiennes du Roy, on entend les voix de rebellion sortir de la bouche des Huissiers de de Selue que le Roy n'est rien à Mets que *Ad honores*, on y trouue tous les moynes qui attendoyent ses nouveaux ostes, le Capitaine de Marsouillers avec ses gens, trois ou quatre des domestiques & autant d'officiers dudit Abbé, encore que de Selue ayt esté si temeraire que d'imposer à la Cour, qu'on n'y auoit trouué que sa sœur toute seule: protestant à la Cour qu'en toute ceste tragedie, elle trouuera que de Selue ne se lauera iamais d'vne seule verité, ains tousiours de nouvelles & manifestes impostures.

19 Cependant soubs la sauluegarde de son bon Ange le 4. De- *Idem.*
cembre 1615. s'euadant par la porte d'endas, & par la porte de la *Idem.*
ville, de laquelle ils se doutoyent le moins, bien que le carrosse *Idem.*
appresté pour l'enleuer, fut à la porte d'enhaut, & toutes les au- *Idem.*
tres portes de la ville ebsedees de soldats pour l'arrester, se voyant *Idem.*
auoir manqué leur proye, & se seruants des pretextes des susdits *Idem.*
iugements de Pistre, Cornier & Marquant & du Bureau des pau- *Idem.*
ures, à l'heure mesme, & sur le champ ils rauagent, & pillent toute *Idem.*
sa maison Abbatialle, sayssissent annotent, & inuentorisent tous *Idem.*
ses biens, meubles, bleds, vins, bibliotheque, iusques à tous ses *Idem.*
papiers les plus secrets sans rien espargner, iusques aux paillasses *Idem.*
& son oratoire. *Idem.*

20 Les cômmissaires de cet inuentaïre Ioly procureur du Roy, & *Idem.*
grand Iâbe tous deux de la pretendue Religion, & ses ennemis ir- *Idem.*
reconciliables, & Praillon l'un des Treze beau-frere de de Selue *Idem.*
passionné de l'exspectatiue de son frere sur l'Abbaye de S. Ar- *Idem.*

noul. Nous auons & productions leur inuentaie, ils ne trouuerent rien dans sa maison surprise d'assaut, & fouillee avec l'immanité, qui se dira cy apres, qui ne fut saint & sacré, & digne de la profession, neantmoins de Selue & Maghin, ont supposé certains crayons infames y auoir esté trouuez, vrayz lineaments de leur ame dementent eux-mesmes leur sacrilege, & exacte diligence à fouiller, & picorer toute la maison, & n'estant possible que tels spectres puissent auoir esté griffonez que par des ames barbares, & denuees du Christianisme.

Idem.

21 Pour euitier la vente scandaleuse de ses meubles sacrez, on offre les pretendues sommes: de Selue n'y veut entendre. On requiert, mais il empesche que du moins on les vende, au moins de frais, & dans la maison Abbatialle n'ayant esté iamais veu en la ville de Metz, qu'on ayt vendu les meubles du moindre Chanoine, ou Ecclesiastique que dedans la maison Ecclesiastique, pour euitier le scandale & la risée de ceux de la contraire Religion, qui sont plus de vingt mille en nombre. L'enchere se faisant en pleine grand place, & l'Huissier bien que de contraire Religion, luy remonstrant qu'il estoit plus decent de donner à quelque maison des Mendians le Crucifix de son Oratoire; Il respond en raillant que non, & qu'il estoit de bonne vente, que c'estoit iour de vendredy, que c'estoit œuvre pieuse; il debuoit attendre le Vendredy Saint.

Idem.

22 Bien que de l'enchere des meubles, il en eust fait plus de neuf à dix mille francs remis en son Greffe & a sa mercy, & partant plus que suffisamment pour assouuir ses pretendus iugements, & Bureau des pauvres, qui ne pouuoient en tout monter à quatre cens francs: Il enuoye sur le champ vng Huissier par toutes les terres, & seigneuries de son Abbaye pour y saisir tous les reuenus, & sur ce que l'Huissier luy remonstra qu'on ne trouueroit pas bon qu'il fit saisir tât de reuenus pour si petite somme, & pour si peu de subiect, & qu'il y en auoit trop de reste en son greffe, il respondit qu'il sayoit tousiours tout, qu'on fusciteroit bien tost d'autres opposans comme il fit: qu'il luy falloir oster toutes armes, & pouuoir de se deffendre: & il se verra tantost avec quelle malice il suscita des creanciers imaginaires, & qui ne furent iamais pour secunder son dessein, & luy oster sous ce pretexte tout moyen de viure & de se deffendre contre luy.

23 Oppressé par de Selue & Maghin de toutes parts, ledit pleignant

gnant a recours au remede des oppressez, prend vn acte d'appel pardeuant Notaires qu'il enuoye par son Recepueur & vn sien Greffier, avec ses iustes protestations au Greffe de de Selue, l'an 1615. le 17. Nouembre, & le 1. Decembre: de despit de l'appel il constitue prisonniers les porreurs, & en desdain de la fleur de Lys, & du nom Royal, dont il mangeoit le pain, les traite hostilemēt, les condamne à faire amende honorable en pleine audience, aux despens & à l'amende, & par iugement emané de sa bouche du 22. Decembre, l'an 1615. Lacere & dechire solennellement son acte d'appel, auant que proceder à toutes ses informations & condēnations diffamantes: c'est à dire deschire la fleur de Lys que le Turc eut reuersee, & honorablemēt baisee, dont les pauvres Innocēts en demeurent diffamez, & leur Seigneur Abbé cōtrainct à les indemniser des amendes & despens.

24 Sentant sa proye hors de ses mains en son Chasteau de Bouxiere, il enuoye des Huissiers & Archers, par diuerses fois apres luy & à ses despens, le presse tellement par ses embusches, qu'il est contraint de se retirer en Lorraine au Pont Amousson, à vne petite lieuë de là le 8. Decembre iour de la Conception de la glorieuse Vierge 1615. où encore par intelligence d'un grand mal-ueillant detenteur de plus de dix mille liures de rente de son Abbaye, il complotte de le prendre, fait sortir de Mets à dessein la compagnie des Carrabins du sieur Bonnourier: & luy fait quitter la place de sa retraicte, & resouldre bien qu'au fort de l'hyuer d'aller se plaindre au Roy qui estoit à Poictiers au voyage de Bordeaux, quittant le Pont Amousson le 30. Decembre de la mesme annee.

Cinq pieces
cotte. P. 1.

L'an 1615.
le 17. No-
uembre &
le 1. Decē-
bre.

Le 22. De-
cembre.

Dix pieces
des comptes
rendus par
les preten-
dus rece-
ueurs, &

le roole des
opposants
pretendus
creanciers.
cotte VV.

L'an 1615.
le 16. De-
cembre.

Le 30. De-
cembre.

CONTRE SON HONNEUR ET REPUTATION.
ENSEMBLE DERECHER, CONTRE TOVS
SES BIENS, ET SES DROICTS.

1. Le iour de son depart du Pontamousson 30. Decembre 1615. de Selue luy enuoye vng messager pour luy dire de bouche, & luy fait escrire par vn Chanoine son amy, que s'il se veut resoudre à payer la susdite pension de deux mille liures, & ne sonner mot de la garde gardienne du Roy luy & tous ses ennemys, luy seront amis, & que tout ce qui s'estoit passé iusques pour lors se-

L'an 1614.

roit mis sous le pied, autrement qu'on le ruineroit de fonds en comble, qu'on informeroit de sa vie, & qu'on fouilleroit iusques aux cendres de son foyer qui estoit sa phrase, Maghin Maistre Escheuin, & le sieur de la Hilliere l'un des Capitaines des gardes quatre mois auparavant luy en estoient venus dire autant dedans la salle abbatiale, & l'an de deuant 1614. Monsieur d'Espernon qui auoit descouvert la conspiration, luy fit l'honneur de l'aduer-tir qu'on brasloit à Mets sa ruine, qu'on vouloit rechercher sa vie, qu'il auoit à craindre les faux tesmoins, encore qu'il fut homme de bien: si adiousta parlant à la Royne Mere, presents plusieurs Princes, Marechaux de France, & Officiers de la Couronne, dedans son cabinet que le sieur Valladier auoit quelques ennemys à Mets, mais ceux seulement qui ne vouloient estre si gens de bien qu'il taschoit, & desiroit les faire, tant par sa doctrine que par son bon exemple. En mesme temps Monsieur de Mauroy intendant de son Conseil, & maison, & Vallier son Secretaire luy donnerent le mesme aduis, & qu'on estoit resolu de le perdre, sous pretexte d'informer contre luy: autres deux des plus signalez du Conseil d'Etat encore viuants, luy en dirent tout autant, & à Monsieur Ardier sieur de Beauregard son Cousin, Thresorier pour lors des parties casuelles, & Conseiller d'Etat, pour l'en aduer-tir. En mesme temps 1614. la seconde feste de Pentecoste luy sortant de sacrifier, vng Religieux reformé fort remarquable, & grand serui-teur de Dieu encore viuant, l'as-seura sur le sacré autel, ou il auoit dit la Messe, estant pour lors accompagné du sieur Mathieu Histo-riographe du Roy que s'il ne se portoit à payer ladicte pension, & à desister de certaine garde gardienne, la resolution estoit prise de le perdre de biens, d'honneur, & de vie. Et requiert qu'il plai-se à la Cour qu'enqueste en soit faicte à ses frais, pour profonder le fonds de la calomnie, & conspiration de de Selue, & de ses ad-herants, obstinez depuis lors iusques icy à sa ruine.

2 Dessors Maghin commença la trame: le sieur Valladier auoit bouché toutes les aduenues de scandale & de calomnie à sa mai-son Abbatiale: auoit donné bon commencement à la reforme d'icelle: ainsi que dessus, & laquelle du depuis malgré toutes tem-pestes & absent, il a heureusement establie depuis la S. Martin pas-sé 1619. pour euitier le scandale, & licence ordinaire aux maisons Ecclesiastiques, voire regulieres de Mets, coustumieres à se seruir

licentieusement & impunément de femmes aux meſnages domeſtiques, il auoit appellé pour pouruoir à telles neceſſitez d'un grand & ample meſnage vne ſienne ſœur vnique, veſue, aagée proche de 59. ans tres-pieuſe, & laquelle a rapporté de la ville de Merz, la reputation d'une vie irreprehenſible, de deuotion & vertu exemplaire, mais neceſſitée de ſe faire ſeruir, elle prit vne vieille fille villageoiſe hors de tout ſoupçon: Maghin à faute de meilleur ſubieſt vng iour abruptement, ſans plainte, & partie, d'autorité priuée, non iuge, ains ennemy & partie, & duquel les procedures violentes contre luy auoient eſté condamnées & miſes au neant par monſieur d'Espernon auparauant, faiſt apprehender & emprifonner la vieille ſervante: ledit Abbé pour lors preſchant en cette ville de Paris, l'accuſant d'eſtre enceinte de ſon faiſt, la faiſt viſiter par des ſages femmes à ſa poſte, leſquelles neantmoins la trouuent, & la teſmoignent vierge & entiere, bien qu'en tel aage. Maghin l'oyt de ſa bouche, le greſſier enfermédans vn cabinet à vitres, qui ne pouuoit eſtre veu de la priſonniere: confus à ceſte premiere poinſte d'une ſi celebre calomnie, Maghin deſiſte ſans paſſer plus auant en ſon entrepriſe.

3 Mais de Selue bien plus ſçauant que luy le voyant eſchappé, & hors de batterie, pour le regard de ces premieres violences, & coniurations, & en chemin de le venir tympaniſer de la bonne façon au Conſeil du Roy, prend le conſeil d'Achab, & de Ieſabel ſa femme, obſtinez d'auoir de force la petite vigne de Nabor ioingnant leur Palais pour en eſtendre le plan; leſquels au refus de Naborescriuerent aux Iuges & principaux de la ville. *Que Nabor auoit meſdit de Dieu, & du Roy, qu'il luy falloir ſuſciter deux faux teſmoings* ^{3. REG. 21.} *enfants du Diable, & le Lapidier: ce qui fut fait & executé & Achab, avec Ieſabel, & toute leur poſterité, punis de mort violente, & deuorez des chiens miraculeuſement.*

4 Au mois de Ianuier 1616. de Selue fonde les moynes desbauchez, qu'il auoit deſia obligé de les auoir maintenu par Iugement en leur libertinage, leur aggraua la peur de la reforme, les ſuborne par promeſſes de l'oeconomat, les ſollicite de crainte de les bannir de la ville, les diſpoſe, & contrainſt en fin à porter faux teſmoignage contre ledit Valladier leur Abbé, ſur tout le Prieur Cloiſtral Moyne conuaincu dès lors d'auoir profané par ſes infames diſſolutions ſa maiſon Abbatiale, & ſur tout vn

autre moyne Jacques D'ompetre, atteint & preuenu de plusieurs crimes tres-enormes, & banny fix ou sept ans durât del' Abbaye, ou il auoit esté remis par indulgence dudit Abbé, pour luy donner le loisir de se iustifier, avec trois autres leurs confraires, bien que soy disants Religieux concubinaires publics, desquels il auoit banny, & deietté honteusement de sa maison les scandaleux & infames obiects.

5 Il falloit vne partie formelle, & quelque cas priuilegié bien grand pour entreprendre sur vn Abbé sacré, portant Croce, & Mitre, ils y portēt par toute sorte d'importunitē, à ce qu'il a cōfessé plusieurs fois en presence de gens, le sieur Ioly Procureur du Roy, bien que son ennemy capital, le plus apparent des Calvinistes, qui se rend partie, & qui du depuis s'en est tout à fait lauē les mains pour se tirer de ceste meslee, Chose deplorable, qu'en telle charge on voye vn homme de ceste profession en vne ville presque toute Ecclesiastique, ou il faut que tout ce grand estat sacré soit à sa mercy, & passe par ses mains, & sous les passions Calviniques.

6 Il falloit sur tout vn greffier à sa poste, & Calviniste aussi pour seruir gaillardement à la passion de de Selue, il prend grand l'ambeson domestique, & affidé pour son Greffier des plus aheurtez à la pretenduē Religion.

PRETENDVE INFORMATION DE DE SELUE.

L'an 1615. PREMIEREMENT pour crime de leze Maieſté sur tous cas le 13. Nou. priuilegié le 13. Nouembre 1615. en la chambre Abbatialle en compagnie des premiers de la ville, & de deux ou trois des plus fameux Aduocats du Parlement de S. Michel, quelqu'un des assistans ayāt mis en auant le propos du soubleuement de Messieurs les Princes pour lors armez, il est vray que tout ce qui en fut dit, & qui se verifera irreprochablement par ledit Abbé, fut que nous n'auions que faire de tels discours à table: que le Roy scauroit bien sans nous s'en demester, & que Messieurs les Princes scauroient bien tesmoigner en fin par leur obeysſſance, qu'il n'y pouuoit iamais auoir iuste subiect aux subiects de se mouuoir contre leur Roy, sur ce, les trois des moines pour lors assis a table entre autres Jacques D'ompetre, & autres deux, des trois susdits, sont appelez pardeuant de Selue, leuent la main sans auctorité d'Abbé, & donnent ce faux tesmoignage, bien que du depuis ils ayēt protesté que c'auoit esté par la force & extreme violence

lences de de Selue & Maghin.

I Qu'il auoit dict à table, que messieurs les Princes auoient iuste subiect d'armer, signamment monsieur du Mayne, que l'on auoit tres-mal recogneu de son voyage d'Espagne. Tout le contraire de ce qui auoit esté dict.

Secondement, preuoyants la nullité de ce faux tesmoignage, facile à conuaincre, & qu'on commençoit desia le traité de Loudun, en mesme temps à sçauoir le Dimanche d'apres la feste de tous les Saints, ledit Abbé preschant en vne sienne seigneurie & Eglise de Cheminot où il est Curé primitif, & Seigneur Regalien: il se seruit parlant à des rudes paysans de la similitude de S. Clement. Que comme Orphee au son de sa Lyre, appriuoysoit & attiroit les lyons, pardales, Loups, &c. Iesus Christ par sa voix Euangelique auoit attiré, & appriuoisé les superbes, qui sont les Lyōs, les Loups, qui sōt les carnaciers &c. & ainsi des autres, qu'il courut sur les sept pechez mortels. Là dessus de Selue scauāt personnage, soubz l'etiquette d'un certain paysan Mangin Preuost criminel, & subiect audit lieu dudit Abbé & parent de Maghin, & qui est celuy que ledit Maghin le fils l'an 1614. auoit rauy de ses prisons Abbatialles, & arraché du gibet où la Iustice le tenoit: soubz le tesmoignege & etiquette escrite de la main dudit criminel, y ioinēt son frere, & autres siens proches & quelques seruiteurs dudit Maghin, ils en font vn crime de sedition ridicule, & de Maiesté Diuine, au defaut de l'humaine.

II Qu'il auoit presché feditieusement & iniurieusement, appellant ses auditeurs & subiets. Lyons, Loups, Renards, pourceaux, &c. Comme si c'eust esté crime de leze Majesté, quand bien il eut dit sur sa chaudi exaggeratiō à ses paysans: *Genimina Viperarum, &c. Vos ex patre diabolo estis, &c. Vnus autem Vestrum Diabolus est &c. dicite Vulpi illi, &c. foris canes, foris venefici, &c.* Et crois que de Selue seroit l'homme d'informer contre les saincts Prophetes qui ont nommé Iesus Christ Lyon de Iuda, Rinoceros, Halicorne, veau gras, Boug de renuoy, vermicéau de terre, qui est le plus contemptible de ce qui se peut dire; *Vermis sum & non homo.*

Ou est à considerer que trois ou quatre moys apres que de Selue, & la generale deputation de Mets, apportèrent ces pretendues informations icy au Conseil, Messieurs les Princes de retour à la Cour, & le traité de Loudun publié, ils teurēt le premier cri-

me symposiaque de leze Maïesté humaine , comme ces iours passez en pleine audience, son Aduocat aussi , & luy-mesme l'ont teu au premier playdoyé, sur lequel il a pleu à la Cour donner au demandeur main-leuee sur les pretenduës saisies de de Selue , & subrogerent le second crime de leze Maïesté diuine perpetré contre les Payfants : beau subiect au Procureur Ioly Huguenot, de conclurre là dessus pour le Roy, & se rendre partie cõtre vn Abbé tres-qualifié à Mets, & à de Selue de iouer ceste tragedie, & y seruir de farce à la posterité.

Pour le troisieme, pour le rēdre odieux à Monsieur d'Espernon, Gouverneur, bien que lors qu'il auoit dit : *Je suis Abbé maintenant, maintenant ie suis Abbé*. Il l'eust dit dans son Chapitre à l'occasion du refus du Nouice de faire profession, & le iour, & l'heure mesme qu'on alloit chanter le *Te Deum laudamus*, en action de graces de la santé recuperee de mondit sieur d'Espernon, que l'on auoit tenu pour mort, de Selue suscite encore deux ou trois faux tesmoins, les trois mesmes Moynes que dessus, Dõpetre, & les autres deux, qui deposent cest autre crime contre leur Abbé. Par deuant quel Iuge du monde a-t'on iamais pris les tesmoignages des Moynes rebelles contre leur Abbé?

III. *Qu'au iour de la fausse nouvelle de la mort de Monsieur d'Espernon il en auoit resmoigné de l'allegresse disant : Je suis Abbé maintenant, maintenant ie suis Abbé*. Imposture si manifeste que les mesmes Moynes du depuis par nouvelle reminiscence Platonique ont recogneu & recognoissent encore que le fait se passa ainsi que dit est, & qu'ils auoient pris l'un pour l'autre, le iour de la mort, pour le iour de la vie.

Pour le quatriesme, le Prieur Cloistral publiquement abandonné à toute impureté auoit esté atteint outre plusieurs autres extremes excez, d'auoir entretenu plus de trois ans durant, l'Abbaye vacante, vne infame concubine, & icelle enfermee en sa chambre tout vn Carefme, la saincte sepmaine, & festes de Pasques, auquel temps les plus abandonnez seculiers se rangēt à quelque espece de resipiscence, & laquelle ledit Abbé apres auoir receu ses Bulles auoit fait bannir de l'entree de sa maison, & ordonné de murer les portes profanes, dediees aux sales entreprises dudit Prieur: qui fut le subiect pourquoy le susdit Prieur Cloistral, & Dompetre, Moynes, auteurs de toute l'information, & l'un des deux concubinai-res defuncts la subornent, luy promettent de l'argent & du bled,

& la produisent eux mesmes à de Selue, pour tesmoigner que le crime du Prieur estoit celuy de l'Abbé. Et se verifera que ledit Dompetre, & autres Moynes, prenoient de la main du Greffier Grand-lâbe, l'original desdites informations, & les luy rendoiēt à volonté pour voyr si les tesmoignages auoient reussi à leur fantaisie; Et voicy le quatriesme chef de leur infame procedure.

IV. *Quel Abbé auoit detenu ceste mesme concubine en sa chambre tout le Carefme, toute la sepmaine sainte, signamment le grand Vendredy, venant de prescher la Passion, & les festes de Pasques mesmes, & ne se confessant l'auoit indemnisée de toute la coulpe.* Imposture non seulement prodigieuse, & euidemment Huguenotte, mais impossible. Le plaignāt arriua à Paris à son retour de Rome en Octobre l'an 1608. prescha le Carefme l'an 1609. à S. Iacques de la Boucherie, fut donné par election speciale du Roy Henry le Grand, pour Grand Vicair à Monsieur le Cardinal de Gyury le 3. Iuin de la mesme annee. l'an d'apres, 1610. reuint prescher le Carefme à Paris à S. Paul. l'an 1611. Il prescha le Carefme audit Mers, & fut postulé Abbé la mesme annee le 28. Iuin. l'an 1612. il retourna prescher le Carefme audict Metz, pendant lequel, monsieur le Cardinal de Gyury deceda le Ieudy Saint: ledict Valladier tousiours logé dedans l'Euesché, & l'an d'apres 1613. prescha le Carefme à S. Iean en Greue: l'an 1614. en la ville de Lyon: l'an 1615. icy à S. Eustache, expulsé de son Abbaye par de Selue, la mesme annee 1615. le 4. Decembre, où du depuis ils ne l'ont laissé approcher iusques à maintenant. Pourquoy l'eust-il indemnisée ne se voulant confesser, puis que luy-mesme la pouuoit confesser sans difficulté? & comme se pouuoit il faire vn Carefme durant, Vicair general de l'Euesché Theologal, & grand penitentier qu'il estoit, accablé de l'abbort de toute sorte de gens & d'affaires, logé en l'Euesché, porte à porte de Monsieur le Cardinal de Gyury, & ne viuant qu'à sa table, que ce grand homme de bien, spectateur oculaire de ses actiōs, desquelles vn an apres il enuoya à sa Sainteté, & icy en Cour des tesmoignages solennels l'an 1611. l'annee auant qu'il mourut, ou quelque autre que luy ne s'en fussēt apperceus, & que de Selue n'ayt peu trouuer autre tesmoin que cette garce subornée par les Moynes? & que ledit sieur Cardinal ayt tousiours aymé si tendrement ledit Valladier, comme toute la ville de Mers la sceu, & l'eust tenu en son seruice iusqu'au dernier soupir de sa vie?

Pour le cinquiesme pour colorer l'imposture, & donner quel que soupçon que feu monsieur le Cardinal en auoit eu quelque sinistre opinion de Selue à excogité.

v. *Que monsieur le Cardinal de Gyury auoit fait murer vne porte regardant sur la rue derriere le departement, & contre le logement dudit son grand Vicaire.* la verité est cognue à toute la ville de Metz, que l'an 1610. incontinct apres le desastre du feu Roy Henry le Grãd, lors que le sieur de Tilladet mit hors la citadelle le sieur D'Arquien: il se fit vne grãde & dãgereuse esmeute nocturne, de ceux de la pretendue Religion, qui se trouuerẽt nuitãment en vn moment plus de deux mille en armes, & se verifia deslors qu'ils auoient conclu de se venir saisir de l'Euesché, & faire passer au fil de l'espee monsieur le Cardinal de Gyury, & son grand Vicaire, le sieur Valladier qu'ils hayssoiẽt plus que tous, si biẽ que plusieurs Catholiques accoururent à leur predicateur iusqu'à son logis pour le defendre, qui le tesmoigneront en temps & lieu, & ce fut la cause que ledit seigneur Cardinal condamna plus de quatre ou cinq iours durant, la grand porte de l'Euesché allant sur la grand place, fit faire sentinelle trois ou quatre nuits, ordonna de murer deux ou trois fausses portes, entre autres celle de son iardin, allant vers son logement, encore qu'il ne fut soupçonné des femmes de ce costelã, & le grand Vicaire de son costé, le plus menassé & le plus en danger, le supplia luy-mesme de faire murer la porte de question de derriere son logis pour se mettre en assurance. Le dit seigneur Cardinal mourut vn an apres, & vn peu auant son trẽspas enuoya en Cour de Rome, & du Roy les attestations solennelles cy ioinctes, dattees du 1. 7. 8. & 10. Decembre l'an 1611. par lesquelles il tesmoigna le grand estime qu'il faisoit de la vie & meurs, de la doctrine, & de la personne dudit Valladier, & pour voir la fourbe & la suite de la coniuration Monachale. C'est le susdit Dompetre moyne, qui a fourny vn certain Hay, son cousin affidé, & confederé du crime qu'on produira à la Cour, s'il est de besoin, & ennemy dudit demandeur, de longue main à cause de sa vie qu'il auoit produitte à feu monsieur le Cardinal, duquel il estoit uallet, & qui auoit souillé & infamé presque toute la famille Episcopalle.

*Vn cayer
d'attesta-
tions cõte
X*

vi. *Pour le sixiesme, de Selue a supposé des crayons lascifs, & infames auoir esté trouues en la maison Abbatialle dudit plaignant.* Imposture
dementie

dementie d'elle mesme: estât vray, qu'apres qu'ils eurent surprise d'assaut sa maison Abbatialle, & que l'Abbé fut contraint de s'euader par la porte d'enas (heureuse rencontre qu'elle n'eust esté muree comme l'autre de l'Euesché) toute l'Abbaye fouillée, mesme avec inhumanité non iamais ouye, qu'on verra incontinent, tous les meubles, Bibliothèques, papiers secrets sur le champ inuentorisez par ses plus grands ennemis le Procureur Ioly, le Greffier grand lambe, & Praillon l'un des treze beau-frere de de Selue, plus que partie.

Ils en dresserent vn inuentaie, & proces verbal icy ioinct, par lequel il est conuaincu qu'il ne se trouua rien en ladite maison ny parmi les papiers secrets, que des fruiçts deses estudes & des tiltres de sa maison, & quine fut saint & sacré, & conforme à sa vie & à sa profession, & partant qu'ils ont supposé tels monstres comme la coupe Ægyptienne, bien qu'à meilleur dessein, & en plus belle espeece fut supposée dedans le sac de l'Innocent Benjamin.

Pour faire voir avec horreur, par ce seul chef le dessein infiny de de Selue à calomnier. Il appelle pardeuant soy sans partie, & d'autorité vn peintre nommé Charles Baret, parce qu'il estoit fermier dudit Abbé à Cheminot, & hantoit fort souuent en sa maison, luy monstre les infames crayôs, l'interroge s'il les a faits, ou veus en sa maison: sur sa constante negatiue pour la verité, luy dict qu'il en a menty, & qu'il luy fera bien dire la verité, l'enuoye sur le cháp par deux Huissiers en fonds de fosse: trois iours apres l'interroge derechef, le presse avec toute sorte de menasses, le recolle & confronte avec les deux femmes prisonnieres, dont parlerons apres: sur la reiteree negatiue, & la declaration des prisonnieres depofans haultement les subornations, & falsifications dudit de Selue & de Maghin, comme elles y ont tousiours persisté du depuis, & persistent encore, de Selue fumant & menassant, laisse tremper ledit Baret encore huit iours durant en prison, & puis le relasche sans forme de iustice, luy enleuant de force quelques deux pieces
cotte T.2. trente pieces de vin qu'il auoit acheptees qu'il faict vendre par les huissiers, voyci les pieces autentiques avec procurarion dudit Barrer pour en faire la poursuite pardeuant la Cour.

VII. *Pour le septiesme, qu'en oyant en confession des femmes Catholiques dedans sa chambre, mesmement aussi d'autres femmes par luy conuerties à la*

Religion Catholique, sous pretexte de ladite conuersion & confession, il leur auroit dict de le Venir treuuer à certaine autre heure, inferants de là qu'il les auroit sollicitées de leur honneur. Ce que de Selue a diuulgué sans explication. Imposture manifestement huguenotte, & honteuse à luy soy disant Catholique, & que tout le consistoire Geneuois n'eust sceu, ny voulu mieux inuenter, tellement conuaincue d'elle mesme, que le plaignant proteste à la Cour que depuis l'an 1608. de son retour de Rome, qu'il changea de profession par l'aduis de sa Saincteté, & vint se rendre tout droict à Paris au mois d'Octobre iusques à auourd'huy 20. de Iuillet 1620. ayant continuellement presché à Metz, Paris, Lyon, Nancy, Pontamousson & ailleurs, il ne se trouuera iamais que quelque importunité qu'on y ayt sceu apporter, ou l'ayt peu, ny veu persuader de vacquer aux confessions des femmes ou filles, exceptee de la Dame Abbessse de sainte Glossine de Metz fille de Monsieur d'Espernon, & quelques vnes de ses Dames, & ce seulement à des occasions tres-vrgentes & fort rares, à cause que ce Monastere a dependu de tout temps de l'Abbé de S. Arnoul, à prendre le voyle de la main, l'enterrement & les Sacrements. En quoy il a esté si exacte & si difficile, que mesme ne se trouuera-il pas qu'il ayt dās tout ce temps là de douze ans entiers, ouys vne douzaine d'hommes en Confession, & ce seulement aux subiets de quelques conuersions fort signalees. Bien que il fust grand Penitentier en tout l'Euesché de Metz, avec tres-ample pouuoir qu'il a encore d'absoudre de tous les cas reservez, & que dans moins d'un an & demy, il eut conuertý à l'Eglise Catholique proche de trois cens ames de l'un & l'autre sexe: y ayant tousiours tenu tel ordre, qu'il auoit tousiours trois Confesseurs deputez, & deleguez sous luy, ausquels il renuoyoit tous les penitents, tant Catholiques que nouuellement conuertys: à scauoir le Pere prieur des Carmes, vn pere Minime, & vn pere Capuchin, qui a special pouuoir à Metz d'ouyr les Confessions qui le tesmoigneront. En quoy il a esté tousiours si Religieux & irreprehensible, que si quelqu'une de ce sexe vouloit communiquer avec luy, il la renuoyoit à l'Eglise S. Victor proche l'Euesché, ne se pouuant trouuer homme de sa robbe qui ayt iamais plus abhorré de traiter avec ce sexe des choses sacrees, & de deuotion ailleurs qu'en lieu sacré, & non suspect: iusques là que pour le regard de l'absolution, que les con-

uertyes ne pouuoient auoir que de luy comme grand Penitencier, *in foro exteriori* il les absoluoit tous solennellement à l'issue de sa predication en la grand Eglise, à la veüe de tout son auditoire, dix à dix, vingt à vingt, iusques à trente & quarante à la fois: suppliant la Cour s'il n'y en a assez pour conuaincre cette imposture Caluinesque, & si elle iuge qu'il soit necessaire pour aggrauer ce crime, & les peines des calomnies qu'il a encourues de decerner commission au demandeur, pour faire enqueste de ce que dessus.

Et pour esclarcir la Cour d'où estoit venue audiēt Valladier ceste si arrestee resolution de s'esloigner du Confessional. C'est que l'an 1608. s'estant porté à Rome aux pieds de sa Sainteté pour se plaindre contre ses premiers mal-veillants, non seulement sa Sainteté PAVL V. luy fit exacte & solemnelle iustice contre vn grand corps des plus puissans de la Chrestienté, ains le combla de toute sorte de graces, & faueurs Apostoliques, ainsi qu'il appert par les pieces icy produictes, luy dōna tous les priuileges, & facultez communes à tous les penitētiars de Rome, à & la compagnie de Iesus qui sont tres-amplés. Dequoy enuieux, & offensez quelques-vns de ses hayneux, trois mois apres son depart de Rome, donnerent à entendre à sa Sainteté, qu'il en abusoit pour les faire reuoker. Dequoy le seigneur Cobelucius pour lors Secrétaire des briefs de sa Sainteté maintenant Cardinal de S. Suzanne tres-celebre & viuant, escriuit au sieur Filessac aussi viuant celebre Docteur Sorboniste en ce Royaume, pour luy en donner aduis, auquel sur le champ lediēt plaignant fist voir l'impossibilité de l'imposture en ce que arriue de Rome icy à Paris en Octobre 1608.

Il deuiant incontinent malade, presqu'à l'extremité chez Monsieur Ardier son cousin, & fut detenu les deux mois entiers de Novembre, & Decēbre en chambre, & ce fut vers le premier iour de l'an 1609. que l'aduis en fut donné de Rome audiēt Filessac, qui en doit auoir encore vne lettre, auquel temps le demandeur n'auoit peu ouyr vne seule confession, ny faire vne seule predication en ce Royaume. Si protestant deslors à ce bon personnage, qu'il se retireroit tellement de la fonction du Confessional, outre le peu d'inclination qu'il y auoit eu tousiours, à cause des continuels estudes; qu'il en osteroit à ses ennemis toute occasion de l'enuyer, & calomnier. Calomnie cependant qui a priué vingt

& autre vingt mille ames du iuste secours qu'elles eussent peu recevoir de luy en cette profession du Confessionnal: en laquelle plusieurs annees durant sous vne autre regle que celle de saint Benoit, il auoit versé avec tant de fruit d'applaudissement, de pureté, & sincerité, qu'il en aura à iamais l'amitié, le tesmoignage, & le gré des villes de Dijon, de Lyon, & d'Auignon, si-gnamment; & est vray que ce fut luy qui esclaireit sa Sainteté des remedes qu'il croyoit estre expedients, & propres pour obuier à des grands inconueniens, desquels plusieurs personnes s'estoient plaintes à elle sur ce subiect contre ses mal-veillants mesme, ainsi qu'elle luy fit l'honneur de le luy communiquer: en quoy il prefera comme il deuoit, la consideration du bien public, & de l'Eglise sainte à son iuste ressentiment, & propre interest.

VIII Pour le huitiesme ils supposent vne certaine qui s'est trouuee ou morte, & euanouye, ou soustraicte au pretendu recollement, sans doute rougissant de voir le iour d'une si sanglante imposture, laquelle il auroit voulu deceuoir de son honneur sous pretexte de luy denouer l'eguillette. Autre calomnie destruiete d'elle-mesme, & par ses auteurs, pourrie desia par leur adueu tacite de l'euanouissement, & soustraction de cette belle piece de leur sac, qui tesmoigne assez qu'elle auoit esté malicieusement supposee, comme toutes les autres.

ix Pour le neufiesme ils font vn gros de quelques garces des plus diffamees de Mers venales, & prostituees autât de leur conscience, que de leurs corps, Qu'ils supposent auoir blasme la pudicité, & integrité dudit plaignant par des priuantes lasciuies, la pluspart legeres, & frinolles mais tousiours scādaleuses & profanes, comme d'auoir passé la main sur le sein, & semblables, mesmes l'une d'elles violemment pressee, & presque forcee de son honneur: entre lesquelles s'en trouuent des traïnees par les Maghins, & par eux mesmes bannies apres auoir esté fustigees: d'autres aussi fustigees & bannies, & long temps auparauant entretenues par le susdict Prieur Cloistral, Ieā Vualtier; qu'elles ont eu malheureusement infecté iusques à trois fois en moins de deux ans, aufquelles il ne faut autre reproche que leur nom, & leur front.

x Pour le dixiesme, pour chef d'œuvre ils ont produictes deux prisonnieres, l'une aagée de plus de soixante ans, l'autre d'aage moyen, garce notoire, & publiquement infame en la ville de Mers: toutes les deux de la plus vile, abiecte, & difforme populace. Dont le pretexte a esté tel: le mary de la vieille
nomme

nommé Gigou paysant vigneron, l'un des seize ou dix-sept vignerons des vignes de saint Arnoul, & en outre le jardinier de la maison, coustumier de se servir de sa femme à son labourage d'occasion à la sœur dudit Abbé de s'en servir aussi domestiquement comme en toutes qualitez nullemēt suspecte aux plus sordides fonctions de la cuisine, tellement neantmoins qu'elle n'y a iamais esté domicilee, ains tousiours en la ville & en la maison de son mary, & ce en l'absence seulement de l'Abbé qui n'a iamais résidé à Mets plus de six mois de suite, occupé à Paris presque tousiours à la predication continuelle, ou du Carefme, ou des Aduents & à ses procès : d'où estant vne fois de retour à Mets, & s'estant apperceu & informé que contre l'ordre qu'il auoit laissé à son départ, quelques fois la vieille se faisoit assister à la cuisine par sa fille & laquelle estoit en tres-mauuaise reputation, mesme d'auoir infecté deslors deux Gentils-hommes des amys de la maison qui le tesmoigneront. Il luy fit interdire deslors & à sa mere aussi l'entree de la cuisine, & maison l'an 1613. auant mesme le premier acte de ceste tragedie, depuis lequel temps, elles n'y ont esté veuës, n'y ouyes l'une, ny l'autre, n'y l'Abbé present, ny luy absent : tout ce que dessus estant si notoire, qu'il ny a personne qui puisse rien alleguer ou mesme feindre au contraire.

L'an 1613.

Neantmoint ce sont ces deux cy, que de Selue, & Maghin l'an 1616. en Ianuier enuoyent prendre prisonnieres, & serrer en la conciergerie de la ville : Ioly Procureur du Roy, & partie tout premier informeluy mesme, & tasche à les induire à charger le pleignant par toute sorte d'artifices, & de ruzes, n'en pouuant rien tirer contre la verité, & l'innocence; Maghin les sollicite par argent, & diuerses promesses, auxquelles de Selue adioust les menaces, iusques à leur presenter la question & la hart. Elles persistent tousiours pour l'innocence, Maghin, & de Selue, cas horrible, sous la facilité du Greffier grand Iambe parfait Huguenot, luy font escrire le contraire de leurs depositions, & relire le contraire de ses escritures, & mettant à charge tout ce qu'elles auoient tesmoigné a deschargé les prisonnieres en ayant eu le vent par les extraicts diffamatoires, que lesdits de Selue, & Maghin en semerent par tout, appellerent dextrement des Notaires & tesmoins, pardeuant lequel elles declarerent la verité de leurs depositions, la fausseté du Secretaire grand Iambe, & des Iuges

L'an 1616.

Neuf pié-
ces cotte T.

pretendus, les violences, subornations, menasses & promesses de de Selue, & Maghin, le tout icy autentiquement produict. Peu apres Monsieur de la Vaux Conseiller en la grand Chambre, accompagné du sieur Bechefer substitué de Monsieur le Procureur general, & du sieur Ramboüillet Aduocat au Parlement enuoyez par de là en commission, priés par de Selue d'aller voir, & ouyr les prisonnières à la Cōciergerie pour diffamer l'innocent y estāts arriues, | elles publiquement, & conformément à leur declaration faicte auparauant pardeuant Notaires descouurent la subornation, avec l'horreur de tous les assistās, & tel affront à de Selue, qu'il en perdit toute contenance: suppliant la Cour qu'ils en soiēt ouys: Et de nouueau il n'y a que trois iours, ont les susdicts maris, & leurs femmes enuoyé nouuelle procuration tres-ample icy attachee pour en auoir raison conformément à leurs premieres declarations. La mine esuentee, le Procureur Ioly declare qu'il n'empesche pour le Roy qu'elles ne soient relachees: sur leur refus de sortir, persistans à leurs despens, dommages, & interests, & reparations, de Selue declare que ce n'est pas luy, ains Maghin, & Maghin dit que c'est de Selue qui les a emprisonnees, là conteste allonge leur emprisonnement l'espace de deux ans, qu'ils prennent des reuenus de l'Abbaye pour les y nourrir, & ne pouuās plus souffrir les clameurs du peuple, & des prisonnières innocentes voicy vn expedient: de Selue & Maghin, d'autorité priuee: & parties formelles sans adueu de Iuge les conduisent icy à Paris, sous la conduicte de Grand-Iambe, & Pistre, les detiennent à Paris en maison priuee, trois sepmaines, ou vn mois; & apres les iectēt dans la Conciergerie du Palais sans Escroüe, sans partie, & sans autre formalité: Elles y sont detenuës encore vn an en misere, & calamité, ou estans trouuees sans partie, & sans forme de iustice, elles sont relaschees, & renuoyees à Metz à leurs maris l'an passé 1619.

*Vne piece
cotte T. 2.*

xi Pour l'vnziesme, pour tirer quelque expedient à la ruine du plaignāt de toute cette belle procedure, de Selue, & Maghin, supposans des faux appels à la Cour, extorquent subrepticement vn arrest sur quelques defauts que le recollemēt des susdicts tesmoins seruira de confrontation, bien qu'ils ne se soiēt iamais voulus porter pour parties: sur cet Arrest, Monsieur de Marefcot Conseiller d'Etat enuoyé pour le seruice du Roy en la ville de Mets, sans au-

eune partie, seulement en vertu de l'arrest, & à la sollicitation de Maghin, & luy Iuge incompetent, procede audit recollement: luy qui auoit auparauant tousiours esté le rapporteur de de Selue, de Maghin, & de leurs consors en toutes ces affaires, & qui n'a eu plus assidu, & domestique assistant, & Conseiller tout le temps qu'il a esté à Metz, que Maghin partie & ennemy capital, d'ordinaire à sa table & à son costé. Et voicy la forme que ledit sieur de Marescot y a tenuë. Maghin a représenté & produit, & sollicité les tesmoins, le sieur de Marescot à pris leur serment: mais parce qu'il estoit occupé aux affaires d'Estat, Grand Iambe le plus coupable en toute cette procedure, & qui a falsifié & diuulgué les depositions, les a luy seul presque tous recollez, exceptes les deux qui auoient esté prisonnières, parce que il y falloit apporter vn peu plus de retenue. En quel pays du monde, at'on iamais ouy parler de telles formalitez? Cependant Dieu le iuste Iuge en a tiré de l'esclaircissement pour l'innocence: les femmes qui auoient esté si longuement prisonnières ont persisté, & reproché en face la falsification & subornation à Grand-Iambe, à Maghin, & à de Selue: quelque bruit qu'on-en ayt semé par deçà du contraire: appareillees de le venir soustenir à tous ceux qu'il appartiendra: la plus part des autres tesmoins se sont trouués ou morts, ou esuanoüys, les autres ont soustenu auoir esté escrit au contraire de ce qu'ils auoient depose. En fin sans que le plaignant s'en soit meslé ny peu, ny point, & l'affaire s'estant passée par ses parties mesmes, *Mentita est iniquitas sibi*, & n'en est restée que la confusion à de Selue, & à Maghin.

xii Pour le douziesme, il supplie tres-humblement la Cour que si apres cecy il reste encore quelque scrupule, ou soupçon aux esprits sur tout ce que dessus, & s'il ne se trouue assez de fait pour conuaincre les calomnieurs, & subornateurs de la plus sanglante imposture, dont on ayt encore ouy parler, il luy plaise de commettre sur les lieux quelque personne non suspecte pour s'informer seriusement de toutes les susdictes subornations, & autres incroyables violences, & fausetez pour faire & parfaire le procez ausdicts de Selue, Maghin, Grand-Iambe, & leurs consors, & en donner exemple à la posterité avec l'adiunction de Monsieur le Procureur general du Roy. Et cependant d'auoir esgard aux chefs qui s'ensuiuent.

1 De Selue sur la premiere boutade de sa pretendue information, assigne pardeuant soy tous ceux qui auoient esté, ou domestiques, ou les plus assidus, & familiers officiers du plaignant pour tesmoigner cõtre luy, il n'en trouue pas vn seul qui ne rende tesmoignage de sa probité, & conuersation Religieuse, ce qui le porte à telle passion qu'il les renuoye avec iniures atroces, & menasses ou les enuoye en prison estroicte au lieu de les ouyr à sa discharge: on en produira tel nombre que la Cour en conceura de l'estonnement.

2 Incontinent que ledict Valladier fut fait Abbé, on establit des espions à gages pres de deux ans durant en toutes les ruës, & auenuës de son Abbaye pour voir iour & nuict, tous ceux qui y entroient, & sortoient dequoy on produira tesmoins des plus qualifiez de la ville, & garnison de Mets, & du tesmoignage d'integrité que cette diligence, & assiduité luy apporta.

3 De Selue & Maghin, sans partie, de leur mouuement, & de l'inuention de leur ame passionnee, assignent les massons, charpentiers, & autres ouuriers ordinaires de la maison Abbatiale: leur demandent s'ils n'auroient fait, ou reconnu auoir esté faites quelques fosses dans l'enclos de S. Arnoul, ou on peut scauoir y auoir des enfans morts nais, furtiuement en terres: descouuerte irreprochable que leur dessein n'a iamais esté que de le perdre.

4 Lors qu'ils enuoyerent sur luy des assassins, au faux-bourgs sainct Germain en plein iour pour l'assassiner, pour animer la populace à l'accabler sur le champ, ils se mirent à crier qu'il auoit manqué à tuer le Roy, & qu'il auoit fait des enfans à sa sœur, dont y a information faite par le sieur Defunctis Preuost de Paris, qui se produira cy apres.

5 On produira tesmoins residents à Paris, qu'en mesme tẽps, & de mesme source on presenta à vne Damoysselle mal famee, deux mille escus pour faire en sorte, d'accoster ledit pleignant, pour surprendre ses papiers, & le faire trouuer mal-versant sur le fait avec elle: l'vn desquels macquereaux fut feu du Travail, peu apres rompu sur la rouë en pleine graue, pour auoir voulu attenter contre la personne de la Roynne mere, & par iuste iugement de Dieu; l'autre est encore viuant non guiere meilleur que luy.

6 L'an 1613. ils subornerent deux garces des plus apparentes pour le venir sonder, sous pretexte de deuotion en l'Euesché:
ses ref-

ses responſes, & ſa Religieuſe procedure, avec la grace de Dieu, les porterent au contraire à vne meilleure vie, & ſ'en allerent ſoudain deſcouverir la conſpiration à vng des premieres Cures de Metz encore viuant, qui le teſmoignera & qui luy en donna aduis.

7 L'an 1614. à Metz luy pour lors abſent & à Paris, ils preſenterent de l'argent à vne autre boyteuſe publiquement prostituée, pour luy perſuader d'aller faire plaincte à l'Official ſon ennemy, de l'auoir voulu porter à mal meſme forcement & avec violence: elle au contraire plus conſcienſieufe qu'eux ſur le champ allant trouuer le ſieur Sergent Maieur le ſieur Capitaine Marſouillier, & le ſieur de Paulo Aduocat encore viuants, & Coppré deſſunct aſſemblés cheux ledict Coppré leur declara la conſpiration, & en nomma les auteurs, Maghin, & Bechamps Chanoine les priant d'en donner aduis audict plaignant comme ils firent: c'eſtoient les premieres Idées & proiezt de leur deſſein, & crois que c'eſt celle qu'ils diſent en leur infame procedure auoir eſté violemmēt preſſée de ſon honneur; ainſi qu'on en a donné aduis de bien bonne part.

8 Pour n'obmettre aucune extremité, le feu ſieur Bonnourrier de Selue, & Maghin font apprehender la ſeruante du feu Abbé de Pontifroy Meſſire de Hem del'Ordre de Cyteaux, qu'ils ont fait mourir d'ennuy, du depuis à l'occafion du demadeur, & ſeulement parce qu'il eſtoit ſon amy, cette femme nommée Barbe du Cort ſage-femme d'office, en la ville de Mets, ſur la ſeule coniecture de la familiarité avec ledict ſieur Abbé, eſt empriſonnée dās vne des caſemates de la Citadelle priſo priuée, & ſoldateſque ou ils la detiennent huit ou dix iours au pain, & à l'eau: luy preſentent la queſtion, & le bourreau, pour la contraindre à teſmoigner & confeſſer contre l'innocence: ſur ſa conſtance à ne vouloir cooperer à la calomnie, & à perſiſter pour la verité, de Selue, & Maghin luy defendent d'exercer l'office de ſage-femme avec commandement de ſortir de la ville ce qu'elle fait, ſe vient rendre à Paris paſſe procuration ample, & narrative de toutes les violences exercees ſur ſa perſonne au ſieur Pelletier Procureur pour ſ'en plaindre à la Cour, & ioindre aux plainctes de cent autres violencez & oppreſſez à la meſme occaſion tous preſts de ſe venir ietter aux pieds de la Cour, pour en tirer raiſon.

9 Sur le renuoy de toutes ces procedures faict à la Cour par le conseil de Selue & Maghin, sans ordonnance de Iuge, & forme de iustice, d'autorité priuee, font faire extraict autentique des pretendues informations, & en gardent autant au greffe de Metz, les font apporter par grãd Iambe toutes ouuertes, attriuees qu'elles sont à Paris il les publient, & les communiquent iusques parmy les festins de table: & apres les auoir faict tellement rouller de table en table, qu'il n'y manquoit plus que les faire crier au deuant de la grand porte au Palais, & par tous les trepieds & ruës de Paris, par les colporteurs, ils les presentent au Conseil qui les met en main à Monsieur de Champiny Conseiller d'Estat, lequel tout premier de son penetrant iugement, & ame equitable descouurant l'imposture & l'animosité, les iette plusieurs mois durant dans vne liette vacante entre les papiers perdus sans en tenir compte, & daigner faire paroistre ce monstre au Conseil; si que derechef les parties sans forme de iustice les luy prennent des mains comme vn vieux & suranné Almanac, & les vont fourrer au Greffe de la Cour, comme vn auorton exposé de calumnie.

10 Ce qui surpasse toute cruauté, & diffamation de Selue & Maghin ont faict tirer cent, & cent extraicts par main de Notaire de leurs infames informations qu'ils ont semées par tout le monde, à Rome, à Nancy, en tout la Lorraine, par tout le Royaume, signamment à Paris, de quoy il ne faut autres tesmoins que tous les principaux du Conseil du Roy les plus apparens de ce Parlement, Monsieur le Cardinal de Rays, & ses Officiaux, & pour le plaignant il en peut exhiber trois diuers exemplaires qu'il a eu de diuers endroits, & des tesmoins irreprochables sans sortir de Paris, sur lesquels extraicts on a esclaircy, & descouuert tout ce que dessus: suppliant la Cour de decerner commission speciale pour faire appeller, & ouyr sur celes Notaires de Metz qui ont faicts les extraicts, & Grand-Iambe qui les a deliurés, & de faire enqueste sommaire de ceux qui en ont eu, & veu en cette ville seulement de Paris, estant ce crime seul par dessus tous inexpiable, & non iamais plus ouy, & surpassant tout le fiel le plus espais de tous les plus renommez calomnieurs de toute l'antiquité.

11 Quand tout ce que dessus ne seroit comme il est, il est certain qu'en toute la ville de Metz, il n'y peut auoir eu iusques icy

tesmoins, ny iuge contre l'Abbé de saint Arnoul, qui ne soit à veüe d'œil reprochable, & notoirement, & hostilement animé:

1. L'ã 1614. la ville en corps plaida cõtre luy pour abolir ses droits, *Donze pie- ces cotte M M.* & fut condamnée par sentēce arbitraire de Monsieur d'Espernon Gouverneur cy dessus produite premiere source de leur animosité. 2. L'ã 1615. Maghin chef de la Bourgeoisie qui auoit esté le principal persecuteur de sa personne & de son Abbaye, & auoit desia voulu informer contre luy, se rend sa partie formelle, & y porte les trois ordres de la ville, qui ont esté parties trois ans durāt, ainsi qu'il appert par leurs procedures icy ioinctes & ne s'en sont deportés qu'apres que Maghin fut debouté de sa charge, & chassé de la ville à cause de ses mauuais deportements l'an 1618. ayans reconnu l'excēs & extremité de sa calomnie, y engageant forcément la bourse publique pour en enrichir son fils, & combattre aux despens du commun la personne, & les droicts du demandeur.

3 Pour de Selue il n'estoit commis qu'entre les soldats de la garnison & les Citoyens, & ne s'est iamais veu dedans Metz qu'il ayt iugé de Citoyen à Citoyen, non pas mesme le moindre fauetier, ny de soldat à soldat, pas mesme du moindre laquais, à cause que le soldat a son Colonel pour son iuge, & le Citoyen la Iustice des Treize, si bien qu'il a voulu rendre l'Abbé de Saint Arnoul, qui est la seconde personne Ecclesiastique de Metz apres l'Euesque, de pire condition qu'un Lanspessade, qu'un laquais, & que le moindre quinquaillier de Metz. Que s'il dist que ledict Abbé s'est adressé à luy, & a contesté deuant luy contre citoyens, ou autres, outre que cela ne se trouuera pas, & que c'ont esté les moynes qui ont plaidé deuant lui, la seigneurie de Flaigny, auāt qu'il eust les Bulles de son Abbaye, & quand cela seroit ç'a esté que ne sçachāt pour lors qu'il fust seulement cõmis entre le soldat, & le citoyen, n'estant subiet au Treize, ny a aucun Iuge de Metz, se voyant sous la garde gardienne du Roy, & croyant que de Selue fust fidelle au Roy, homme de bien, & craignant Dieu, & auant luy auoir faict signifier ses gardes gardiennes, qui renuoyent l'Abbé de saint Arnoul à Vitry, il s'adressoit à luy comme Iuge Royal, & le plus proche, & pour entendre tousiours en la ville de Metz l'authorité du Roy de quoy il a abusé: si n'a point de honte de dire qu'il pouuoit estre son iuge

*L'Auguste
Basilique
le 1. & le
3. liure de
quoy les
originaires
ont esté
deus au
Conseil.*

iusques à informer de sa vie, luy Iuge non seulement seculier contre luy Ecclesiastique Abbé, sacré, mitré & croisé, mais partie & ennemy iuré qui l'auoit iniurié atrocement, & poussé iniurieusement en sa maison, & attenté auant sa pretendue information contre tout ce qui pouuoit appartenir à son Abbaye & à sa personne. Ce qui le rendoit tres-incôpetant, quand bien il eust esté ce que non, presidant en chef, & sans reserve. 4 Toutes les gardes gardiennes de nos Roys a eux suffisamment auparauât signifiees dès l'annee 1614. leur auoient interdict toute cognoissance de tout ce qui concerne l'Abbé, & l'Abbaye de saint Arnoul pour ne rien dire des saints Canons, & des Loix mesmes Imperiales tres-expresses, les Indults de tant de Papes, tant de iugements donnez en Cour de Rome contre l'Euesque mesme de Metz, & vn grand nombre de confirmations des Roys. 5. Pour le sieur Bonnouurier qui auoit la force en main, & le gouuernement de toute la ville: de quel moyen manquoit-il pour opprimer vn Abbé, & en sa personne & en sa reputation, s'estant si estroittement allié, & interessé avec de Seluc, & tellement confederé avec Maghin, que presque tout le temps qu'il a gouuerné à Metz, il n'a eu autre protocole, Conseiller & Pedagogue que luy. Merueille de la prouidence diuine enuers son seruiteur, & Ministre innocent de son autel, que toute vne ville portee pour partie formelle, la force d'un gouuerneur irrité & suspect: l'animosité & le nom d'un iuge Royal, la violence d'un Maistre Escheuin transporté, la hayne d'un Procureur Ioly. & de Grand Iambe Greffier, de contraire & ennemie Religio, n'ayent peu produire tel effort d'imposture, & de faux tesmoignage, que d'accabler vne innocence quand elle eust esté Angelique: puisque ce furent les trois efforts supremes de Pilate President, d'Anne & Cayphe Princes du peuple, & d'Herode qui firent succomber l'innocence, & Sainteté mesme du Sauueur du monde à la Croix, & à la mort sous la calomnie de deux ou trois faux tesmoins, subornez sous masque de pieté, & de la destruction imaginaire du temple avec cet interest le principal. *Veniunt Romani, & tollent gentem nostram.*

12 De Selue & Maghin passant bien plus auant se sont portez s'il eust esté en leur pouuoir, à meurtrir & deschirer l'ame du plaignant ayant semé eux-mesmes vne diffamation plus atroce que la mort, par toute la France, Italie, Lorraine, Flandres & Allemagne que

gne, que ledit Valladier auoit fait banqueroute à la foy Catholique, & estoit Ministre Calviniste, tantost en Angleterre, tantost à Strasbourg, & à Geneue. On produira tesmoins irreprochables, que le fumeur en a esté de Selue icy à Paris, qu'ayant ceste imposture esté escripte par celuy qu'on produira, à Rome à Monsieur le Cardinal Bellarmin, & par luy au S. Pere, sa Sainteté l'a creu plus de six mois durant estre ministre du Roy d'Angleterre, iusques à ce que par les attestations des Princes de Lorraine, & de tous les Ordres de Nancy, Capuchins, Iesuites, Minimes, Carmes reformez & autres, elle fut esclaircie du contraire: & encore auourd'huy plus des deux tiers de la France, mesme presque de Paris, le croient au grand scâdale de l'Eglise Catholique, calomnie desesperee, qui a porté si auant la precedente diffamation, qu'estants sortis au iour plusieurs tomes de ses Predications, & autres œures mal-gré & parmy tant de trauerses, pour l'edification du public, le Libraire Imprimeur tesmoignera que sur ces faux bruits, plusieurs luy ont rendus, & rapportez ses liures qu'ils auoient achetés, & que la debite qui en auoit esté auparauant remarquable, en a esté presque supprimee: playe inexpiable, & que tous les Ministres de contraire Religion de ce Royaume, n'eussent sceu, ny peu faire, ou desirer plus grande. Argument demônstratif que tout le dessein de de Selue, & de ses confors n'a iamais esté autre, que de le diffamer & le perdre, & sous le faux bruiet faire precipiter ses affaires au Parlement.

13. De Selue sur les susdictes pretenduës informations, 1. Decrette contre luy prise de corps l'an 1616. en Ianuier & bien plus: incontinent, *LE PRIVE tout à fait de son Abbaye, chasse son Receueur, casse ses baux & ses fermiers. ESTABLIT DES OECONOMES COMME L'ABBAYE VACANTE.* Ce qui n'a iamais appartenu qu'au Roy, le legitime Abbé ou Euesque decedé, ou iuridiquement priué: y establit d'autorité des nouueaux Receueurs fermiers, & officiers. 2. De Selue tire parole des Moyntes qu'ils postuleront pour leur Abbé le Chanoine Praillon son beau-frere, & du Nepueu du sieur Bonnourier sur ceste promesse, luy & Maghin & le sieur Bonnourier les declarent oeconomes de l'Abbaye, demettent tous ses officiers, & en font d'autres, trois ans durant 1616. 16 7. 1618. Tout ce qui se fait, & se passe concernant l'Abbaye de saint Arnoul, & l'autorité Abba-

Vingt pie-
ces cote
A. A.

tielle, se fait au nom des Prieur & Religieux, œconomes & administrateurs au spirituel, & temporel. 2. Defenses par de Selue ausdits Religieux, & à tous ses subiets de le recognoistre pour Abbé, & pour Seigneur, & à tous fermiers & debiteurs de ne payer ny obeir qu'aux moynes & Recepueurs par eux establis. A tous Procureurs de procurer, à tous Notaires de stipuler, à tous sergens & huissiers d'exploiter, à tous messagers de porter, ou rendre lettres de luy, ou pour luy: à tous citoyens, & à tous subiets de bien parler mesme de luy. Tyrannie incroyable qui a duré encore avec plus de rigueur que cela quatre ans durant, dont voicy les pieces autentiques attachees. 3. Toutes les mesmes defenses & spoliations se redoublent par les moynes qui administrent des lors avec violence incroyable toute l'Abbaye.

14 A l'instant de son decret, de Selue enuoye des Sergens, Huissiers, Archers & Carrabins apres luy, & pour le surprendre en Lorraine, & par tout où ils scauent de ses nouuelles. Prend argent de son greffe de la vente des meubles, & de ses autres les plus liquides reuenus pour les defrayer liberalement iusques là, que Maghin luy seruant d'argentier en prend si prodigalement qu'il en met en sa bourse vne bonne partie, les Huissiers le luy reprochans il pourchasse leur ruine & les contraint de sortir de Metz & du pays: ils seront ouys quand il plaira à la Cour.

*Attentats contre la Souueraineté & Majesté du Roy, & de-
rechef contre tous les biens, & droicts du sieur
Valladier Abbé.*

1 **S'**ESTANT plaint au Roy d'une si extreme oppressio par Re-
 2^e an 1616. Squeste, il obtient des patétes au grād Sceau du 30 May 1616.
 le 30. May. par lesquelles expressément 1. sont faictes defences à toutes per-
 sonnes de troubler ledict Abbé en la paisible iouissance de sō Ab-
 baye. 2. est ordonné que ses Fermiers, Receueurs, & Officiers su-
 bsisteront, & que les fermiers ne payeront à autre qu'à l'Abbé. 3.
 Vne piece Que le pretendu œconomat n'aura aucun lieu avec defences aux
 patense en moynes, & à toutes personnes de s'immiscer à la perception des
 original fruiçts, ou au maniement de ladicte Abbaye, que ceux qui y sero-
 cote BB. 1. establis de sa part à peine de deux mille liures d'amende, 4. Pour

l'exécution elles sont adressées au sieur Bonnourier avec commandement d'y tenir la main, à ce que nulle iniure ou violence luy soit faite. 5. Aux Juges tenans le Presidial de Vitry, commandement d'informer sur les violences, & oppressions contre luy exercees par ledict de Selue, & consors.

2. Le sieur Bonnourier, de Selue, & Maghin, empeschent non seulement l'exécution, mais la signification des susdictes patentes, constituent prisonnier Maistre Pierre Valladier licencié es droicts son nepveu, porteur, avec l'Huissier Taron desdictes patentes, & de la Requête en forme de factum presentee au Roy, mis en basse fosse torsionnairement, & avec violences extraordinaires par de Selue, & Maghin: le Chanoine Praillon pretendu futur Abbé, & son frere Praillon Treize beaux-freres de de Selue eux-mesmes, en pleine place prennent au collet ledict Valladier, le despoüillent, le fouillent, luy rauissent les pieces de questiō, & le traient eux-mesmes scandaleusement en prison par les ruës les plus celebres. Sur nouvelle Requête en plainte, tant sur cette premiere rebellion, que sur tous les precedents attentats de de Selue, & consorts, il obtient autres deux Arrests au Conseil priué du Roy du mesme iour 13. Iuillet 1616. L'un au rapport de Monsieur de Boyssise. 1. Que Cornier, & Pistre seront assignez pour y venir defendre, cependant main-leuee à luy des saisies faictes en vertu desdicts iugemens. 2. Defenses à toutes personnes de le troubler, ou empeschier en la possession, & iouissance de son Abbaye. 3. Defenses audict de Selue d'entreprendre aucune Iurisdiction, ou cognoissance sur sa personne, les domestiques, subiects, ou ses biens, à peine de tous despens, dommages, & interests. L'autre au rapport de Monsieur le President de Bersy sur vne Requête du refus, & rebellion contre les susdictes patentes du Roy, l'emprisonnement torsionnaire dudit Pierre Valladier son nepveu, & autres attentats contre les patentes de garde gardienne, par lequel arrest est ordonné. 1. Que lesdictes patentes, & leurs commissions seront signifiees à de Selue, & consors, & executees selon leur forme & teneur. 2. Que personne ne sera si osé de le troubler en la paisible possession, & iouissance de son Abbaye, & nommément de ses lettres de garde gardienne à peine d'en respondre en leur propre & priué nom, & de tous despens, dommages, & interests, & de mille liures d'amende en cas de contreuention.

L'an 1616.
le 13. Iuillet

3 Que Pierre Valladier sera eslargy des prisons, & à ce le Geolier contreint mesme par emprisonnement de sa personne. Et ce S'IL N'EST detenu qu'à cause de ladicte Requeste d'oit il estoit porteur : chose ia iugée par le Conseil, & neantmoins de Selue s'en plaint encore comme de libelle, & en masque l'emprisonnement dudit Pierre Valladier adioustant le Conseil que s'il se trouuoit emprisonné pour autre subiect que pour auoir esté porteur de ladicte Requeste & Arrests, il fut conduit aux diligences du Procureur Ioly aux prisons de sainte Manchou, outre ce 4. defenses à de Selue, Maghin, aux Treize, & tous autres de prendre aucune cognoissance des differents dudit Pierre Valladier, & de tous autres Officiers, & domestiques dudit Abbé, & de tout ce qui le concerne. 5. Commandement au Capitaine Bonnourier de tenir la main à l'execution des susdictes patentes, gardes gardiennes & Arrests.

4 Tant s'en faut que de Selue, & Maghin, & Bonnourier obeissent: Maghin arrache des mains de l'Huissier Thierry les patentes & Arrests, les supprime, & les detient plus de trois mois durant: en empesche non seulement l'execution, mais la signification. 2. Chasse Thierry l'Huissier, le persecute à ruine, & luy en couste plus de cinq cents escus, mesme le contrainct sur peine de prison de faire vn procez verbal à sa poste. 3. emprisonne plus profond qu' auparauant Pierre Valladier, le detiēt encore deux ou trois mois apres les Arrests. Et puis le faisant venir en pleine audience le contraint à faire amende honorable au son de la grand cloche, le condamne aux despens, & n'ayant rien à prendre sur luy, enuoyé executer Charles Baret son fermier, & maieur en sa iustice de Cheminot, pour lesdits despens, montants à plus de cinq ou six cents francs, & le faict iuger par les Treize, bien que desia interdicts par tant de patentes & Arrests: en voicy tout le procez, & l'execution en six pieces. 4. De Selue de son costé donne nouveau iugement que personne ne recognoistra autre Abbé que les Religieux, & ne payera qu'à eux. 5. Maghin comme Maistre Elcheuin le confirme, bien que tout leur fust interdict par sa Maiesté. 6. Bonnourier approuue, autorise, & soustient le tout avec main forte. 7. Tous les trois de Selue, Maghin, & Bonnourier, & le sieur Mommas son successeur, maintiennēt par force les Moynes, & pretendus Receueurs, fermiers, & officiers en leur pretendu

excono-

*Six pieces
cotte NN.*

*Enist pie
ces cotte
OO.*

oeconomat, & ne desistrent de la Jurisdiction a eux interdite tant de fois, premierement par les lettres de garde gardienne, & puis par patentes expressees au grand Seau, & par les susdicts Arrests.

5. Serrez de pres, descrivez, & diffamez au Conseil du Roy, en fin sous l'autorité du sieur Bonnourier, la violence de Maghin Maistre Escheuin, l'animosité de Selue soy disant President, ils assemblent l'Estat, (car ils parlent ainsi en ce pays là ie ne sçay depuis quand.) C'est à dire les citoyens de tous les Ordres: huit, dix, quinze, vingt fois pour l'animer, & rendre partie contre ledit Abbé, à quoy ce bon peuple tesmoing oculaire, & spectateur asseuré de ses deportemens, & de son integrité, & à veuë d'œil de l'extreme passion de ce triumvirat, n'y veut aucunement entendre.

1. Maghin publiquement propose l'indemnité à ceux qui se voudront rendre partie contre luy sur la procedure de de Selue, comme par apres l'an passé de Selue voulut presenter vn certain pour partie à Monsieur le Procureur general, & pour à ce l'induire luy auoit promis deux mille escus, mille contant, & autre mille apres
2. En l'assemblee Maghin commande comme chef que tous ceux qui voudront parler pour Valladier se mettent d'vn costé. 3. la voix cōmune esclate que si luy, & de Selue ont des animositéz particulieres cōtre luy, qu'ils les desmellēt: ceux du party de la cōtraire Religio opinēt de mesme. 4. Les trois, ou quatre premiers qui commencent à parler pour ledit Abbé sont par Maghin incontinent, & publiquement enuoyez en prison. 5. Maghin, & de Selue voyans les assemblees de l'Estat exemptes de leur passio, falsifiant l'autorité publique, dressent vne procuration generale au nom de l'Estat qu'ils enuoient signer de porte en porte, par leurs complices, & les ennemis seulement du plaignant, protestant à la Cour qu'il ne s'y en trouuera de signé aucun autre sous le nom des trois Ordres, qui ne fut reconnu pour tel auparauant par toute la ville de Metz. 6. Sur le refus des Abbés, Doyens, Chanoines, & autres les plus apparens de contresigner leur passion, ils leur font, & leur vont dire qu'on les bannira de la ville, & qu'on les enuoyera à la Conciergerie. 7. Finalement donc sous cette falsificatiō publique & monopole, condamné par toutes les loix, de Selue, Maghin & Bonnourier deputent d'autorité priuee, bien que sous le nom supposé DES TROIS ORDRES DE METZ.
• Deux du clergé ses ennemis iurez estrangers, & de tout temps

mauuais seruiteurs du Roy, l'un desquels estoit Beschamps Chanoine qui auoit porté à trauerfer les Bulles à Rome vn Seigneur du pays qui les y contraria pres de deux ans durant avec les confederes de de Selue: deux de la Noblesse le sieur de la Hilliere Capitaine en la garnison, & le sieur des Marché de la pretendue Religion, qui y apporta tousiours plus de moderation, & de conscience que tous les autres: quatre du tiers Estat. Le ieune Maghin fils de son pere qui a esté député quatre, ou cinq ans durant & commis en cet affaire la pluspart à dix-huict escus le iour, sans estre tenu de rendre compte. Fraillon, l'un des Treize beaufrere de de Selue, deux autres de la pretendue Religion: quatre passeuolants pour fortifier la bande, le sieur de Selue pretendu Iuge, vraye partie, & indubitable ennemy qui yvient sur la bourse commune, assisté de Grand Iambe son Greffier, & confort huguenot, de Louys medecin de mesme secte, qui sont les parfaicts, & infatigables sollicitours. Outre ce, ils enuoyent trois emissaires avant-coureurs pour faire assassiner ledict plaignant avant leur arriuee, proche de son logis au faux bourgs sanct Germain, à scauoir Iacques Dompetre sien Moyne, vn certain Bazoille, & Brahaut encore huguenot, & autres qu'on nommera en temps & lieu.

L'an 1616. le 21. Iuill. 7 Ce squadron député, & supposé, armé faussement sous correction du nom des trois Ordres arriue à Paris enuiron le 21. Iuillet l'an 1616. à la mesme heure, quelques assassins sous la conduite de Dompetre, Bazoille & Brahaut manquerent leur coup; pour grossir dauantage, vont par les rues à la sollicitation à cheual file à file, & en haye pour faire plus longue traisnee. Employent toutes les plus grandes faueurs de la Cour contre luy assisté seulement de la prouidence diuine de sa fonde, & de sa houlette, & de l'equiré de sa cause, de la douce iustice du Conseil & de la grande clemence de Monsieur le Prince, sans l'autorité duquel ils cuidoient desia l'auoir englouty.

8 Il est ouy en plein Conseil d'Estat contre de Selue: Messieurs les Princes, & Cardinaux, & officiers de la Couronne presens la troupe des deputez postulans à la porte de dehors: où il le vesperiza si proprement sur tous les chefs contenus en ce petit inuentaie (sans que sa memoire luy en destroba vne seule sillabe) & avec tel desarroy de de Selue, que n'ayât iamais eu le courage de repliquer à vn seul des crimes qu'il luy auoit obiecté en vne si Royale cō-

pagnie, & avec vn accent si graue, il commença à begayer, & à barbotter ie ne sçay quoy entredents sur le subiect de ces calomnies & pretendues informations: de sorte que le Conseil fut contrainct de luy imposer silence, & le renuoyer sur le champ; ce qui luy causa vn tel auertin que plus de trois sepmaines durant il dormoit tout debout. Et sur ce, estant entré l'Huissier Cyrier pour dire au Conseil que Messieurs les deputez de Metz demandoient audience: le demandeur la leur auoit si bien apprestee que le Conseil leur fit dire, qu'on sçauoit bien ce qu'ils vouloient dire, & qu'ils s'en retournassent d'où ils estoient venus.

9 Le lendemain de Selue est appelé a part au Conseil, là ou à huys clos il fut mené, & laué iusques au moindre cheueu de sa teste, non pas comme il meritoit, mais à peu près: si bien que tout esperdu la mesme sepmaine il cherche quelqu'vn pour traicter avec luy de sa charge, preuoyant bien que si on faisoit iustice, & si on la fait encore, comme il n'est nullement à douter, c'estoit autant de perdu pour luy: si commença incontinent à en composer avec le sieur le Prestre, & sous les vaines esperances de se releuer du precipice ou il s'est plongé, ayant dilayé & procrastiné tant qu'il a peu l'affaire: finalement à l'heure mesme qu'il a sceu l'arriuee dudit pleignant en cette ville de Paris resolu de le mener tout comme il merite, il en a traicté & conclu avec monsieur Charpentier, lequel trouuera sans doute que la marchandise ne vaut pas l'argent, & que de Selue la traicté en marchant, comme on dit, de Paris à plus de moitié de iuste prix.

10 Pour la bande supposee des deputez dans peu de iours, ils tirent à la courte buche a qui deslogera le premier, ne pouuants bonnement demeurer, & n'osans honnestement s'en retourner: ils crient, & declament par les ruës qu'il n'y a point de iustice au Conseil du Roy pour eux contre luy, que Monsieur le Prince les a traictés comme des chiens: & de faict sur l'emprisonnement de mondiect Seigneur le Prince qui fut sur leur debendade: en leur cabaret ils se r'allierent, & firent feu de ioye de son emprisonnement: si fut si hardy l'vn d'eux du nombre de la Noblesse, d'aller dire à Monsieur le Garde des Seaux que ceux de Metz ne pouuoient auoir au Conseil iustice contre Valladier: mais **QV'ILS SE LA FERIENT PAR FORCE**, comme ils firent incontinent apres, & voicy comment.

II Pour supreme effort se seruants du changement du temps, Maghin & de Selue, caiollent le Marquis d'Ancre, luy promettent la ville & gouuernement de Metz, à l'exclusion de monsieur d'Espernon gouuerneur, à condition qu'il les delchargera & defaira de l'Abbé. Il n'y a que trop de preuues de cette coniuration: deslors le Marquis d'Ancre luy demande son Abbaye, luy offrant vne pension aquiualente à prendre sur tel banquier de France qu'il esliroit: sur sa constante resolution de n'exposer son Abbaye à bâqueroutte, il se ioint de passion à ses parties, & sous main autorise la suppression de ses patentes & arrests.

12 Pour le reduire à toute extremité, le voyant spolié de tout son reuenu, & que par ses continuelles predications, il pouuoit viuoter & preualloit tousiours contre tous leurs efforts, ils trament avec le Marquis d'Ancre, de luy faire defendre la chaire à Paris: voyants que Monsieur de Paris, maintenant Cardinal de Rais, y apportoit de l'obstacle par sa prudence, & consideration paternelle, prennent aduantage sur sa longue absence pour faire iouer le jeu à Fournier official, & d'autre part voyâts que la Royne mere Princeesse d'incomparable clemence & pieté, n'y vouloit entendre, ains tesmoignoit en cette occurrence sa grande Religion, & equité, mesme l'inclination qu'elle auoit tousiours eu a proteger ledit sieur Valladier, & tout ce qui est de la iustice, & du culte diuin, dresserent au conseil estroit vne batterie des plus puissantes de ce Royaume, pour luy rauir la chaire, & sur l'extreme opposition qu'en firent messieurs les Marguilliers de S. Barthelemy, ou il auoit desia commencé de prescher l'Aduent, firent vn tel tintamarre, que la Royne Mere fut contrainte d'en faire assembler vn Conseil expres plus de quatre heures durant, composé de monsieur Mangot Garde des Sceaux, de Messieurs de Chasteauneuf, de Pontcarré, de Boysise, & de Commartin, tous tres-affectionnez audit pleignant, & portez à l'equité de la cause:

*Vne piece
cotte Z. 2.
Billet de la
part de la
Royne leu
en chaire à
S. Barthe-
lemy.*

lesquels finalement luy ayants faict entendre que la Royne Mere avec regret le prioit de ceder, pour vn peu à cette occasion, avec assurance de s'en souuenir à meilleur subiect, & de l'employer incessamment en choses aussi serieuses pour le seruice du Roy, hon-teux del'honneur qu'il recepuoit d'vne telle priere plus efficace sur toutes ses voluntez, que mille commandements, il y acquiesça avec grande facilité & repos d'esprit. Trop heureux d'auoir peu trouuer

trouuer à cette occasion vn subiect ou de complaire à la Mere de nostre grand Roy, Mere auparauint ausy de sa petite fortune: mais à laquelle on n'auoit pas descouuert le fonds, ny le subiect de cette coniuration: pardeuant lequel Conseil, messieurs les Marguilliers de saint Barthelemy sous la conduite de monsieur Cheualier Conseiller au Parlement, l'obligerent estroitement de leur zeile, & tesmoignage vrayement Catholique: le voyla donc deiecté par de Selue & les consors de la chaire, & de sa profersion au dommage & scandale de l'Eglise, Catholique, & de mille & mille ames qu'ils ne scauroient iamais reparer.

13 Cependant apres auoir esté ouy comme dessus au Conseil d'Estat contre de Selue: fut la Requête, dont il s'est plaint du depuis comme diffamatoire, tendent à la cassation, & reparation condigne de ses pretendues procedures, & à ce qu'il pleut au Roy *Vne pice* renvoyer le tout à vne chambre du Parlement, tant redouté du- *cotte E.E.* dit de Selue: sur icelles procedures ausi, & sur sa Requête tendât à reparation d'honneur deuë à sa qualité: interuient Arrest du 27. *L'An* Aoust 1616. au rapport de monsieur de Boyssise, renvoyant le *1616. le* tout respectiuelement à la quatriesme Chambre, & du depuis par *27 Aoust.* euocation à la deuxiesme des Enquestes, où le pleignant seroit tenu de plaider & ester à droit. Et cependant lesdites procedures pretendues de de Selue, avec ses decrets surcis, avec main leuee des choses saisies, en vertu de ses pretendus iugements.

14 Parce que bien que par les autres susdits precedens arrests ledit sieur Valladier eust esté redintegré en ses biens, droicts & Abbaye, & ce nonobstant, leur rebellion, oppression, & spoliation duroit tousiours: il les presse derechef au Conseil, sur leurs rebellions & violences contradictoiremēt avec leur general Agent le leune Maghin seul restant de la debandade, de la troupe deputée: obtient contre eux six autres puissans Arrests icy ioincts *Le 24. Sep-* 1. Arrest du 24. Septembre 1616. que monsieur le President de *tembre.* Bercy maistre des Requestes, & Conseiller d'Estat, se transporterait à Metz pour faire obeyr le Roy, faire executer ses patentes *Sest pices* & arrests, mettre en liberté Pierre Valladier prisonnier, & prou- *cotte E.* uoir aux autres chefs mentionnez audit Arrest, nonobstant oppositions ou appellations quelconques, luy donnant de ce entiere, & pleniere iurisdiction. Maghin député pour parer à ce coup presente Requête au Conseil, au rapport de monsieur de Maref-



cot tousiours rapporteur des parties aduerfes du demãdeur, contenant les caufes de recufation, contre monfieur de Bercy, lefquelles iugees friuolles, & luy deboutté, attaque ledit fleur de Bercy en la Cour mefme du Louure, luy dit que s'il va à Metz pour telle cõmiffion, il y fera receu avec le canon, & n'en reuiédra de mefme, avec autres paroles de rebellion: & fur ce fait iouër de fi puiffant refforts du Marquis d'Ancre & autres, qu'il eft cõtraint de s'en excufer. Et de mefme Mõfieur de Chälai qui lui auoit eflé subrogé avec cõmiffion tres-ample fignée en cõmandemēt. 2. Arrest cõtradictoire du 27. Ianuier 1617. Que Nicolas Maghin Maître Escheuin & les Treize, de Selue, Cornier cõmis Preuoft, Nicolas Maghin Treze, & le Procureur Ioly, Iean Vuautier Prieur de faint Arnoul & autres fpecifiez en la Requête feroient assignez, & euoquez à la deuxiefme chambre pour venir respondre en leur propre & priué nom des violences, rebellions, & autres attentats contre les patentes, & Arrests du Roy, & les chofes appartenantes à ladiète Abbaye. 3. Arrest du 27. Feburier 1617. Que Iean Vuautier Prieur Cloiftral, Sebaftien Floret oncle, & nepueu, Iacques Dompetre, & Michel Religieux de S. Arnoul, & Mangin cordonnier foy difant Religieux viendront respondre à la feconde chambre des Enqueftes fur leur pretendu æconomat, vfurpation, & dilapidation des biens, & reuenus de ladiète Abbaye, emprunts faits au nô de leur Abbé de fomme enormat, mes qu'ils fe font appropriees pour en rendre cõpte, & en payer le Reliqua: enemble fur tous autres differents concernant leur rebellion, & le temporel de ladiète Abbaye. 4. Autre Arrest que ledict Abbé donneroit Vicariat pour faire & parfaire le procez à Iacques Dompetre, & Iean Vuautier Moynes atteints de plusieurs grands crimes. Ce qu'il faiet leur baillant pour iuges à Paris Mefieurs les Prieurs de Cluny, de faint Germain des Praiz, & de faint Victor, tous Reguliers, & perfonnages qualifiez, ou ils n'ont iamais voulu respondre, & contre la prife de corps, contr'eux, par eux decernée, fe font tousiours garantis par la force, & fupport du feu fleur Bonnouurier, de Selue, & Maghin. 5. Principal arrest contradictoire avec Maghin Procureur des trois Ordres pretendus de Selue, & Maghin du 30. Ianuier 1617. consent ledict Maghin au nom que dessus qu'il iouyroit paisiblement de fon Abbaye, que fon pere rendroit les patentes, & ar-

L'An

1617. 27.

Januier.

27. Feb-
ruier.

30. Jan-
uier.

rests qu'il auoit violemment retenuës, appoinctement pardeuât les Commissaires establis par le Conseil, Monsieur de Bersy Rapporteur du plaignant, & Monsieur de Marefcot le leur: & sur ce interuenu arrest que lesdictes patentes, & arrests luy seront rendus, & icelles signifiees & executees selon leur forme & teneur, qu'il iouyra paisiblement de tous ses biens, & en cas d'opposition à l'execution, & le surplus de ladiète Requête, renuoyee à la deuxiesme chambre des Enquestes.

15 Accablez de tant d'Arrests, ils le recherchent d'accord, en enuoyêt procuration speciale à Maghin leur député, qu'il luy fait voir, à quoy il cōdescend tres-volōtiers, ainsi qu'il auoit desia fait auparauant à Metz, lors de leurs premiers attentats, s'en remettant premierement au sieur Bonnouurier, puis à la Dame Abbessse de sainte Glossine à sa priere, ce que de Selue empescha tousiours: le député Maghin auant tout, promet de traicter avec luy en homme de bien, l'accord commis aux deux susdicts Commissaires du Conseil, Messieurs de Bersy, & Marefcot: apres leur auoir accordé les trois chefs à luy proposez de la part des Ordres, sous l'esperance qu'ils auoient, qu'il ne s'y rangeroit iamais, tirant vne missiue qu'il leut tout haut du sieur Bonnouurier, declara qu'on ne pouuoit entēdre à aucun accord avec ledit Abbé, & qu'on auoit reuoké pour ce regard sa procuration: & sur l'estonnement, & affront fait à Messieurs les Commissaires, & audiēt demandeur, Maghin declara ainsi qu'il auoit desia fait vne fois pardeuant Monsieur de Marefcot en sa salle, & vne autre fois par deuant Monsieur de Bersy en sa chambre, que le Roy n'auoit que voir à Mets, & qu'il n'y estoit nullement souuerain, ains seulement Protecteur, contre toute verité, & avec temerité, laquelle deuoit sur le champ estre exemplairement chastiee: estant notoire que le maistre Escheuin, & Treize de Mets, vsurpent, exercent & denient la souueraineté, & la iustice appartenant au Roy: lascheté & desdit, qui luy arriua de la soudaine esperance, du support du Marquis d'Ancre, qui commença deslors à presser l'Abbé plus viuement que iamais de son Abbaye, & à luy faire vne tres-mauuaise mine, comme si firent tous ses officiers les plus affidez.

16 Il y auoit desia deux ans qu'il ne tiroit rien de tout son reuenue par eux detenu de force, partant contrainct d'importuner ses

*vingt pie-
ce : taxes
enormes,
arrests,
actes : cette
pp.*

amis à Paris, desquels par diuerses fois, il emprunta iusques à quelques quatre ou cinq mille liures, lesquelles ne pouuant payer a poinct nommé, ny satisfaire au loüage de sa maison qu'il auoit fort bien meublee, on luy vendit publiquemēt par deux fois tous ses meubles, & sa Bibliotheque, & tous les plus precieux escripts, iusques à luy detenir sa Chappelle, & Croce Abbatiale: oppressiō & spoliatiō de ses biens, si sanglante que n'ayant iusques icy il y a cinq ans peu payer lesdictes quatre, ou cinq mille liures, ny eu le moyen de respondre seulement pardeuant les Iuges, ils ont fait monter les fols despens, & interests immenses par mille piperies, voleries de chiquane, & preuarication de ses procureurs, & Ad-uocats, à plus de vingt cinq mille liures, qui estoit le but où de Sel-ue, & Maghin auoient tousiours visé, à le rendre necessiteux, & ruiner l'Abbaye qu'ils ne luy auoient peu raur: dont voicy toutes les pieces iustificatiues.

17 Il fut donc contrainct pressé d'une part du mauuais dessein du Marquis d'Ancre, & de l'autre de l'extreme necessité, ou ils l'auoient reduict de quitter Paris, & aller debattre sa vie & son bien luy-mesme à Mets armé d'un port d'armes à luy octroyé par sa Maiesté, à cause du siege de Soissons, & d'une ample sauuegarde du Roy avec le sieur de Ramezay porteur d'icelle, Archer tenāt lieu d'exēpt des vingt cinq à la manche des gardes, Escossoises, auquel sa Majesté Roy vrayement iuste, & clement cō-manda par deux fois de sa propre bouche qu'il eust soing de la personne du demandeur, & ne permist luy estre fait aucun tort, non plus qu'à la sienne, & d'auoir soing de luy, & luy en rendre bon compte.

18 Arriué au pays Messin il se va rendre en son Chasteau de Bouxiere & aduertit que Jacques Dompetre Moyne autheur, & acteur de toute cette tragedie estoit avec Bazoille, contre lequel y auoit prise de corps, à Cheminot, autre sienne seigneurie presque ioignante, il le fait prendre prisonnier, relaschant Bazoille, & le lendemain se iettant à ses pieds, & luy promettant sur le S. Autel, & les sacrees Reliques, avec serments estranges que désormais il luy seroit obeissant, s'oublant du passé, le mit en liberté, & le renuoya à Metz pour luy seruir, ou il fit encore pis que deuant contre luy deux ans entiers apres, obstiné en sa Rebellion.

19 Le lendemain de son arriuee auant se presenter à Metz il enuoye au sieur Bonnouurier par l'exempt des gardes la sauuegarde du Roy, ses patentes, & Arrests pour les faire signifier, l'accompagne de trois gentils-hommes pour recors, de Tarō Huissier Royal de sainte Manehou, d'un Procureur sien special, & d'une sienne lettre pleine de respect, & de submission, le priant de trouuer bon, conformément à la volonté du Roy, qu'il r'entra en sa maison Abbatiale desolee, abandonnee & sans chef pour y seruir Dieu, & s'acquitter de son deuoir: il luy mande pour responce, que s'il se presente aux portes de Mets, il y sera le tres-mal receu, & qu'il y faisoit fort mauuais pour luy: & pour lors Maghin à cheual en housse, deux pistolets à l'arçon de la selle, & de Selue avec le Procureur Ioly accourās à la Citadelle tous hors d'halaine d'abbord à la lecture publique de sa sauuegarde, Maghin dit tout haut qu'il en auroit autant pour deux sols, qu'il falloit enuoyer le garde du corps, & tous ses adssistants en fonds de fosse, & portent Bonnouurier a retenir les arrests & patentes, qu'il permet le lendemain par Beau semblant, estre signifiée, par un Huissier de Mets, accompagné de Taron dont voicy tous les exploits.

Vn cayer
cotte FF.

20 Sur le champ ils y contreuiennent en tous leurs chefs sous faux pretexte d'une Requête supposee des trois Ordres, commençant ainsi: les trois Estats de la ville de Mets, & finissant signez, *Maghin maistre Escheuin: Jacques Fois Doyen, Jean de Beschāps, Jean Pretor, Jean Praillon, Nicollas Roussel Verneville, C. Flentot Preuost de saint Tibaut, Chinolle, Floze, Trauant, D. Balbo, Praillon.* Trahison descouuerte, d'elle mesme falsifiant les trois Ordres sous le nom de Maghin, cinq Chanoines, de deux freres de de Selue, de trois huguenots De Verneville contre lequel il auoit plaidé le primiceriat qu'il luy rait, biē que sa Sainteté, & le Roy le luy eussent donné. Sur cette imposture de trois Ordres, Bonnouurier dès le lendemain enuoye apres ledit sieur Abbé Marchal Lieutenant du Preuost avec ses Archers pour luy mettre la main dessus, sous pretexte de luy signifier son ordonnance portant que luy, l'Archer des gardes, & toute sa cōpagnie eussent à vuidier du pays Messin avec exprés commandement de ne s'y plus retrouver, & autre commandement secret en cas de resistance de leur courir sus, les emmener prisonniers, ou faire main basse. Et sur ce

Dix huit
pieces cotte
GG.

que Marchal Lieutenant luy remonstra qu'on leur auoit signifié le iour aparauant les patentes & arrests du Roy à ce contraires, Bonnourier ordonna derechef, dont voicy les ordonnances autentiques avec les exploits *QVE SANS AVOIR ESCARD AVX PATENTES ET ARRESTS DV ROY.* Il passeroit outre.

*Retraite
derriere
en Tourai-
nel an
1616. le
21. Mars.* 21 A ce coup si vaillant de Bonnourier, & sur nouveaux bruits, & aduis certains que le plaignant trouua par delà, il sentit incontinent l'effect de la resolution prise avec le Marquis d'Ancre, dont les fers estoient fort chauds au feu: qui fut la cause, qu'à grand haste delogeant de sa maison de Bouxiere & euadant d'une petite demy lieuë seulement les Archers, & le Preuost, il fut contrainct se refugier en Lorraine le 21. mars iour de S. Benoist l'an 1617. ou deux iours apres le 23. du mois il passa procuration sous le bon plaisir de sa Maiesté pour auoir pour coadiuteur de son Abbaye Nicolas François de Lorraine, fils à Monsieur de Vaudemont laquelle coadiution au gré de sa Maiesté, bien que concludë sous forme d'accez, & de certaine cession, sans rien ce-

*Deux pic-
ces cote
H.H.* der qu'apres la mort, passa en Cour de Rome, en sorte qu'en effect elle n'est qu'une pure & simple expectatiue, & coadiution sans plus: dõt voicy la procuration, & la copie autentique des Bulles.

22 Mais voicy vne autre estrange imposture de de Selue, & ses consorts: battus de tant d'Arrests du Conseil pour donner quelque pretexte à la spoliation d'un Abbé, & de toute vne Abbaye, & puis croyans que le Prince qu'il prenoit pour appuy, en Lorraine ne souffriroit pas, ou du moins ne deuroit pas souffrir que les arrests demeurassent sans execution, ils suscitent des creanciers imaginaires, auxquels ledict Abbé ne deuoit iamais rien, ainsi qu'il paroist par le Roolle cy ioinct des pretendus opposans, & par la collocation du depuis faite, cy iaignans quelques réels creanciers: signamment la pension de deux mille liures, faillissant le tout, bien qu'il y eust main-leuee des deux tiers par

*Vncayer
des oppo-
sants avec
les consen-
temens du
sieur Vall-
dier cote
Q.Q. 1.* arrest du Cōseil, & main leuee du total par arrest passé par apointé audit Conseil: lequel nō des creanciers ils firent pour lors rentir par tout pour couvrir leur pretendu conomat, la destitutio des fermiers & Recepueurs du plaignant, & la dilapidation de tous ses reuenus, dont il fera paroistre claiement à la Cour: estoit ce les voyes qu'on tient pour payer des creanciers de depōsseder un Abbé de son Abbaye?

23 Pour rompre donc le faux pretexte des creanciers voicy les diligences dudit Abbé. 1. l'arrest du conseil qui auoit commis vn Maistre des Requestes pour l'execution de ses arrests ainsi que dessus donnoit pouuoir de desguerpir tous creanciers & faire leuer toutes saisies. Il enuoya par expres de Nancy à la Cour le sieur de Mirecour maintenant Agent de monsieur de Vauldemont, pour, à quelques pris que ce fut, auoir ledit Maistre des Requestes: patentes en font expediees avec commission attachee à l'arrest, à Monsieur d'Ormesson pour lors en l'armee de Champagne: du 11 Mars l'an 1617. qui apporta toute sorte de deuoir pour s'acquitter de sa charge, mais la nouuelle en estant arriuee à Mets on enuoya iusques a l'armee, & puis iusqu'à Chaalons messenger expres pour faire sçauoir qu'il y feroit receu avec le Canô, & s'abusoit d'esperer d'entrer en la ville de Mets avec autres menaces 2. frustré de ce costé, le plaignât enuoye vn autre solliciteur en Cour pour avec ledit sieur de Mirecour en faire nōmer quelque autre en la place de mōsieur d'Ormesson, & emprūte neuf cēts liures de monsieur de Vauldemōt pour fournir au viatique: on cōmet de nouveau monsieur Foullay avec cōmissiō fort ample signee en cōmandemēt du 12. Octobre 1617. il dresse son appareil, la veille de son depart, réuoye l'homme pour luy dire de l'aller attendre au Pont Amouffon, & l'instruire pleinement de tout ce qu'il auroit affaire: mais sur l'heure de son depart, on dit audit sieur Foullay, & luy fait-on dire, que s'il se hazarde d'entreprendre telle commission, on luy tirera la moustache, avec autres trames & menasses estranges, que la Cour s'il luy plaist pourra sçauoir de luy: voyla donc quatre maistres des Requestes l'vn apres l'autre, bien que commis par arrest du Conseil, intimidez, & empeschez, & les arrests du Roy sans effect, & sans auoir peu leuer le masque malitieux des pretendus creanciers.

24 Outre ce redoublant ses efforts ledit Abbé à euenter cette mine, enuoye l'an 1617. vn Procureur general, & special à Mets avec offre & pouuoir absolu de payer tous les legitimes creanciers nommement, & specifiquement la pension de deux mille liures, du plus liquide, qu'il fait registrer au Greffe de deselue avec sa procuratio, il est repoussé deux & trois fois, & finalement banny de Mets, par Bōnouurier, avec defēses de s'y retreuer pour negotier pour Valladier, sur peine de punition corporelle. Il recharge à l'entree

de l'an 1618. y enuoye derechef vn sien Procureur, & Receueur domestique Spinderuaux, avec procuration tresample de payer les creanciers, mais particulièrement la pension ainsi que dessus: lequel Procureur est incontinent saisi par des sergents, & des soldats, basoüe par le sieur de Mommas successeur de Bonnouurier, banny de la ville avec defences sur peine de la vie de s'y retrouver pour negotier quoy que ce soit pour Valladier. Et sur le champ les Praillös beaux freres de deselue fõt vne esmeute, rassemblēt quelque populace pour le prendre, & le precipiter dans la riuere, s'il n'eust esté secouru, & ne se fut promptement euadé: voicy toutes les pieces iustificatiues de ce que dessus.

25 D'autant que la saisie pour la pension seruoit du plus fort, voire du seul pretexte, & subiect a ce masque des creanciers, ledit Valladier par l'entremise de Monsieur le Cardinal de Montpoltan Nuncce de sa Sainteté, se resout de consentir par appointéé
L'arrest icy
bas Coste
SS.
 a vn arrest au conseil icy ioinct du 30. Ianuier l'an 1617. aux conditions qu'on luy cederait trois mille liures des arrerages, desquels la quittance fut mise deslors en main a mondict sieur le Cardinal, & par luy a son depart remise en main de Monsieur le Nuncce Illustissime d'auourd'huy 2. qu'on luy donneroit incontinent mainleuee de tous ses biens 3. le tout sans preiudice des droicts, & priuileges de l'Abbaye de S. Arnoult, & fait promesse de trois cens liures au Secretaire Desbois sous autre nom, sur l'assurance qu'il luy auoit baillee, qu'il parroit dedans deux, ou trois iours pour aller mettre ledict Arrest en execution, & pour assurance del'accord en fit passer acte pardeuant Notaire. Mais au contraire sur le champ ledict Secretaire enuoye saisir tout le reuenu de l'Abbaye en vertu dudit Arrest: par toutes voyes monopole avec de Selue, de rendre impossible audict pleignant lesclaircissement desdicts creanciers, & sur ce luy enuoye a Nancy l'Huissier Froment le sommer de payer ladicte pension avec les arrerages, lequel Froment celuy qui auoit rauagé & oppressé toutes les terres, & subiects de S. Arnoul, il receut humainement, le faisant boire, & luy fit coucher sur son exploit trois choses 1. qu'il auoit desia consenty a vn arrest donné au conseil & qu'il ne tenoit qu'à luy de le faire executer sur ses biens, dont la iouissance luy estoit empeschée. 2. Qu'il consentoit puremēt, & simplement qu'il s'en paya du plus liquide. 3. Que d'abondant il commettoit des a
 present

present ledit Froment Huissier son commis, Recepueur, & Procureur special pour payer les arrerages de ladite pension. Ce que ledict Valladier fist preuoyant bien où tendoit ce malicieux pretexte des creanciers qui estoit la catastrophe pretendue par de Selue, laquelle voicy.

26 Suppliant la Cour de prédre icy garde à la plus estrange surprise qui se puisse faire. Les bulles de la reserve de ladite pension portoient la clause ordinaire comminatoire & commune, qu'en cas que ledict Valladier refusast de payer ladite pension, le pensionnaire pourroit entrer en possession de ladite Abbaye, comme vacante, sans autres bulles que de celles de sa pension, bien que l'Abbaye n'ait iamais esté de la collation de sa sainteté, ains sous le droit d'ellection suiuant le concordat Germanique: sur laquelle clause le Secretaire des Bois apres & nonobstant tout ce que dessus, se transporte à Metz avec l'original des susdictes Bulles, de pension, change & dissimule son nom, se presente pour prendre possession de ladite Abbaye, *CAVSA NON SOLVTÆ PENSIONIS*. Et en mettre dehors l'Abbé titulaire: les Moynes y consentent librement, bien-heureux d'en auoir trouué l'occasion: Beschamps & Foës Doyen, en fût la puissante brigue, personne ne s'y oppose, n'y deféd pour luy que ses plus grands ennemis, à sçauoir le sieur Bonnourier qui y auoit vn plus proche interest pour le beau-frere de son nepueu, & de de Selue, & le Procureur Ioly, qui n'auoit point de volôté que celles du sieur Bonnourier, lesquels s'y opposerent pour le Roy: & prenans pretexte, de ce qu'en vne ville frontiere, & en temps de trouble le Secretaire auoit changé son nom, le firent sortir plus viste que le pas, & peu s'en manqua qu'il n'alla en prison: enquoy se void à l'œil la prouidence diuine à conseruer le bon droit de l'oppressé, qui auoit auparauant biē que par pure cōtraincte consenty à l'Arrest icy ioint portant main-leuee tres-expreslément, recherché toute sorte de moyens pour la faire payer, bien que le paiement, chose estrange, luy en eut esté rendu impossible par ceux mesme qui sembloient vouloir estre payez, mais qui ne le vouloient pas pour enuahir l'Abbaye.

27 Ayants manqué à ce coup, ils se iettent au supreme desespoir & à vne entreprise dont on n'a iamais plus ouy parler, l'an 1618. vers Septēbre, sur la nouuelle que les Bulles d'accez estoiet

passées à Rome en faueur de Nicolas François de Lorraine, sous l'attache du Roy: ledict sieur Valladier Abbé encore viuant, & sans aucune sentence de priuation, ils portent les Moynes rebelles à eslire vn nouveau Abbé, l'un d'entr'eux Sebastien Floret Aumosnier, si abandonné de Dieu, & precipité à l'anatheme, qu'il en accepta l'eslection: on l'appelle desia Monsieur l'Esleu, on préd cinq cens escus de la vête du vin du plus liquide reuenu de l'Abbé qu'on dōne à Fleutot vn certain trotteur tres infame entre les Ecclesiastiques de la ville de Mets, pour aller faire passer la nouuelle eslection à Rome: mais par iuste iugemēt de Dieu, il tombe aupres de Basle es mains de certains soldats passants qui le laisserent presque mort de coups d'espee, luy enleuerēt tous ses paquets: & luy donnerent le loysir d'attendre à Basle nouuelles depesches de Mets pour acheuer le voyage qui ne luy fut guiere plus heureux à Rome qu'à Suisse: car peu s'en falut, s'il n'eust mussé sa depesche qu'il ne fut coffré en Tour de none qu'il a il y a si long tēps meritē & s'il luy fallut encore donner du reuenu Abbatial plus d'autre: cinq cents escus à son retour: la violence peut-elle arriuer plus auant?

28 Desia les Moynes comme dict est, auoient vsurpé auparauant tout le temps de l'administration pretendue, toute l'autorité Abbatiale, iusques là que non contents d'auoir chassé ignominieusement de son Abbaye Claude Valladier nepueu dudict Abbé qui luy auoit donné luy mesme l'habit de Nouice, ils receurent en sa place autre quatre, ou cinq Nouices contre ses tres-expresses defenes, contre les saints Canōs, & cōtre les Bulles de sa Saincteté: & qui est encore pis, enuoyerent aux ordres mal-gré luy autres cinq Nouices, mesmes en firent passer Prestre l'un d'eux auant l'age, preuenu de crime enorme, & incapable de Prestrie, qu'ils ont voulu qualifier du nom de Profez, avec tant de violence que les susdicts pretendus Nouices, bien qu'ils ne soient Nouices, iouyssent aujourd'hui chacun d'une pension esgalle à celle des vrayz Religieux Profez reformez, & les autres cinq pretendus Nouices, *in Sacris* au double, biē qu'ils ayent perdu, & le droit d'estre nouices ayans conuolé aux Ordres mal-gré l'Abbé, & persisté en la rebellion formelle si long-tēps, ouyt-on iamais parler vn tel desordre auoir esté introduit à vne maison Religieuse par autre que par de Selue, Maghin, & le Procureur

Ioly: qu'il faille que l'Abbé nourrisse neuf personnes, qui ne font
& ne disent aucun office, qui se sont intrus par force en la mai-
son, du plus clair de son reuenu: à quoy il plaira aussi à la Cour
de pouruoir par son equité, & prudence, comme à vn sacrilege re-
sultat du pretendu œconomat introduict par ledict de Selue, &
ses confors.

*Six pieces
des violē-
tes proce-
dures des-
dicts No-
uices, cotte
TT.*

29 Cependant ledict Abbé destitué de tout moyen de viure,
enuoye à la destrobbee par ses terres pour tirer quelque chose: les
Moynes portez à la haute rage fōt prendre prisonniers tous ceux
qui s'y presentent, iusques à son Aumosnier Prestre qu'ils font
prendre & lier par des Archers du Preuost Cornier, qu'ils ont
toufiours eu à leur deuotion, iour, & nuit: & pour payement le-
dict Cornier deposse les fermiers establis par ledict Abbé sur
les vins de Bouxiere, Cheminot, & Esply, & les foings de Ma-
rieuil, se les fait bailler par force, & à vil-prix, & le cueille luy-
mesme avec ses Archers violément, nō obstant toutes oppositiōs
de la iustice: contraignant au charroit les subiects à coups de ba-
stons: & venu le temps de payer au Recepueur le vil-prix de la
ferme, le retient pour salaire des couruees qu'il a faites pour les
Moynes à courre leur Abbé, ses seruiteurs & ses subiects, comme
voleurs, ou feres sauages.

30 Il se resolut donc de faire vn dernier effort pour leuer le faux
pretexte des creanciers. Le sieur de Billistein de l'ancienne caual-
lerie de Lorraine tenu à garantir sa pretendue debte sur saint Ar-
noul au sieur du Mesnil Massé son beau-frere, ennuyé de ce que
les biens estoient tous saisis, il y auoit plus de trois ans, au nom des
creanciers, sans qu'aucun d'eux en eust touché vn dernier, se pre-
sente luy-mesme d'aller faire leuer ce masque, à ses despēs, moyē-
nant que le demādeur luy baille ample, & suffisante procuration:
ce qu'il fait y allant avec grand appareil au mois de May l'an 1618.
où il fit d'abbord tellement bondir de Selue, & Maghin le voyāt
resolu de borner à ce coup leur malicieux pretexte, qu'il y fut plus
d'vn mois, tantost aux menasses, tantost à autres mille tours, &
destours: & tout ce qu'il peut à la parfin: de Selue consent en ap-
parence au payemēt des creanciers, moyennant qu'il obtiēne du-
dict Abbé vne procuration en la forme qu'il luy bailla dresse, &
escrite de sa main. Entre autres, qu'il deputerait deux Commissai-
res des Treize de Mers avec pouuoir d'ouyr les comptes des pre-

*Dix pieces
cotte ZZ.
les Coptes
les baues*

tendus fermiers, Receueurs, & œconomes: de faire la collocation des creanciers, & sur le tout de iuger souuerainement, à cause que ledict Abbé est regalien, & iuge sans appel, donnant grace en toutes les terres. De Selue croyant cette forme deuoir estre impossible audiect Abbé, la voyant par luy expediee, & passée sans reserue: pris au mot commença à s'en desdire, & à vouloir qu'il fut adiousté en ladiete commission, qu'il se deporteroit de toutes les patentes, & arrests qu'il auoit obtenu au Cōseil du Roy. Ce qu'il ne voulut accorder, ains y adiousta expressément la clause, *sans preiudice des patentes, & Arrests de sa Maiesté, & sans son recours de tous ses despens, dommages & interests, contre tous ceux qui auront dilapidé, & dissipé ses biens, soit pareux, soit par autre.* Sur quoy de Selue, & Maghin se demenerent fort long temps, & en fin ne pouuans plus supporter les cris, & les affronts des creanciers, qui les alloient brauer à toute heure, signamment du sieur de Billistein qui les assassinoit d'importunité, ils luy dresserent vne querelle d'Allemand, le firent constituer prisonnier en son logis, & garder si estroitement l'espace de deux mois, qu'on ne pouuoit parler ny traicter avec luy, qu'en presence des gardes: si fut encore par ce moyē l'entreprise eludee, & de Selue avec Maghin victorieux.

30 Et pour faire paroistre que ce n'estoit plus vne passion, ains vn excès d'inhumanité, & d'vn desir insatiable de voir ledit sieur Abbé exterminé de toute la nature: en mesme temps ils enuoyent des deputez iusques à quatre fois, l'vne sur l'autre, à son Altesse de Lorraine, avec l'extraict de leurs infames informations, & des lettres tres-pessantes du sieur Bonnouurier, pour la supplier instamment de le chasser de la Lorraine, dequoy ils s'estoient desia si asseurés (sous la faueur d'vn soy disant Primat de Nancy, son ennemy ouuert & déclaré, (qui luy detient iniustement, il y a quarante ans, sa seigneurie de Lay, de dix mille frācs de rente, sous tiltre de prioré, & d'autres pretextes friuoles) que plus d'vn mois durant ils firent croire à toute la ville de Mets qu'il estoit banny de la Lorraine: bien que son Altesse iusques là, n'eust tenu compte de leur instante poursuite, & qu'il preschaft ordinairement à Nancy.

31 Et pour esclaircir la cour, sans repliche, qu'il n'a iamaïs tenu qu'aux feu Bonnouurier, de Selue, & Maghin, que ledit sieur Valladier n'ayt payé ses creanciers, & n'ayt iouy de son bien. Incontinent

nent que monsieur d'Espéron Gouverneur fut arriué à Metz, la
 mesme année 1618. vers le mois de Iuillet, Bonnourier desla
 mort, les Maghins de gradez, & chassés de la ville & de Selue eua-
 dé, ledit Valladier poursuiuant sa poincte, & se joignant mon-
 sieur de Vaudemont y enuoyent vn Procureur commun, Rouf-
 son Aduocat à Nancy, auquel incontinent & equitablement mô-
 dit sieur d'Espéron, permit de faire rendre compte au pretendus
 Recepueurs, & fermiers, & de colloquer & payer les creanciers
 sur les reliquats & arrerages des années 1612. 13. 14. 15. 16. 17. & 18. *Vt supra*
 suivant la procuration susdite, & aux mesmes conditions, & sans *cotte VV.*
 preiudice aux patentes & arrests du Roy, & de son recours *vingt pie-*
 contre tous ceux qu'il appartiendra, pour tous ses despens dom- *ces comptes*
 mages & interests: ou a esté à plein descouuert ainsi que verra la *Sc.*
 Cour par les comptes, que ledit de Selue & Conforts ont dilapi-
 dez & employez contre ledit Abbé pour le perdre plus de cent
 à six vingt mille francs du plus liquide de son reuenu, & qu'en
 cette seule collocation, pour rien, on luy en a dissipé plus de huit
 mille liures.

32 Et si cela ne suffit pour mettre au iour ceste maligne trame
 des creanciers tyssue par de Selue, quand bien les creanciers eus-
 sent saisi, comme il dit, estoit-ce la forme de Iustice de deposse-
 der l'Abbé de son Abbaye? soubstraire tous ses Religieux, & tous
 ses subiets de son obeyssance, avec deffences de luy obeyr, & de le
 recognoistre pour Abbé? casser tous ses fermiers, officiers, & Re-
 cepueurs, & en establir d'autres? y mettre des œconomes, cōme si
 l'Abbaye eust esté vacante? le chasser & bannir de sa maison Ab-
 batiale, & de toutes ses terres? & ce qui surpasse toute inhumani-
 té, priuer l'Abbé de tout aliment, luy qui est premier de tous les
 creanciers, & qui doit viure de l'autel malgré tous creanciers? &
 comme aufera de Selue soutenir en face de ce sacré Parlement
 que ce n'est pas luy qui luy a detenu ses biens, ains les creanciers
 estant par ce que dessus tres-notoire, que c'est luy qui a estably la
 susdite rebellion, & luy a rendue le payement des creanciers im-
 possible par mille artifices & violēces? & qu'il appert à veuë d'œil,
 qu'il ne s'est rien trouué pour payer les creanciers, bien qu'il n'y
 ayt eu année des trois 1616. 17. 18. que la recepte n'ayt monté a
 plus de trente mille liures, qui sont plus de quatre-vingt dix mille
 liures: sans conter les arrerages & reliquats des années precedētes

montants à plus d'autres quarante mille liures, tout ce qui paroist par les pieces, & par les comptes cy dessus produits.

33 Sorty de ce dedale des pretextes des creanciers, & de l'animosité de de Selue & de Maghin, dontez par leur fuite, & equitable iustice de monsieur d'Espernon, la continuation de la rebellion des Moynes, ietta ledit sieur Valladier leur Abbé dedans vn autre labyrinthe, quil'a empesché iusques à ce iourd'huy 27. Iuillet de l'an mil six cens vingt, de iouir de son bien, comme il en auoit esté empesché depuis l'an mil six cens quinze, les anneés precedentes: d'autant que lesdits Moynes acharnez à leur administration, obstinez à leur reuolte, & intimidez de la iuste crainte du nombre incroyable des crimes, & excès par eux peptrez contre leurdit Abbé, poursuiuent plus qu'auparauant à emprisonner tous ceux qui estoient enuoyez de sa part, à leuer & dissiper ses rentes, bien que le masque des creanciers fut osté, & en vn mot à le priuer en tout, & par tout de son autorité Abbatiale & de toute sorte d'aliment. Ce qui le porta à telle extremité, qu'il fut contraint pour iouir de son bien de passer vn certain transport, de tous ses reuenus à Monsieur de Vaudemont pour emprunter son nom sous certaines conditions portees par vn contre-transport passé le mesme iour par Viard notaire, tous les deux à Paris le 14. Decembre l'an 1618. à sçauoir que par preference à tous ledit sieur Valladier se retenoit franchises & quittes toutes les rentes de l'Euesché de Mets, & autres situées hors du pays Messin pour son aliment, & entretien, & de toutes les autres ledit Seigneur de Vaudemont en payeroit les creanciers, signamment de Paris, desgageroit sa Chappelle Abbatiale, & Bibliothèque, & autres choses à luy appartenantes, fourniroit aux frais de tous ses procez, &c. Et finalement que ledit Valladier romproit ledit transport, toutesfois & quâtes que bon luy sembleroit d'autorité priuée, & sans forme de procez, soit que les creanciers fussent payez ou non, & que l'oppression des Moynes cessast ou non: mais au lieu d'auoir tiré commodité dudit transport, il n'en est arriué que la ruine de l'Abbaye, & presque dudit Abbé: premieremēt en ce que au lieu de payer cinq, ou six mille liures deuës à Paris l'an 1618. lors du transport, que ledit Abbé auoit esté contraint d'y emprunter, à cause de l'iniuste detention triennale de tous ses biens, on l'a tellement chicané, & malméné qu'on a fait

môter les frais & despës à plus de seize mille liures, sans auoir touché au principal qu'on luy veut faire porter encore auioird'huy. Secondement en ce que ledit seigneur de Vaudemont ayant iouy l'an 1619. de tout ledit reuenu, il a denié toute sorte d'aliment audit Valladier, mesme a fait saisir à son nom les terres par luy reservees, & certains arrerages à luy nullement transportez de l'Euesché, ce qui la reduict à toute extremité, ainsi qu'il paroist par les pieces cy ioinctes: qui a esté la cause, qu'on l'a laissé succomber à des contumaces icy au Parlement, iusques a vn decret de prise de corps, protestant à la Cour que la dernière fois qu'il est sorti de Nâcy au mois de Mars dernier passé, il n'auoit en sa puissance vn seul teston de son reuenu, quelque instance qu'il en eut peu faire quinze iours durant enuers ledit seigneur de Vaudemont: & estant pressé par ledit decret de sortir, il fut nécessité & pressé iusques là, que d'emprunter d'vn sien subiect trois, ou quatre pistolles, & de la vente de quelque peu de meuble, faire pour tout viatique iusques à sept pistolles sans plus, qu'il fit dedâs deux heures, qui fut tout le loisir qu'il eut pour s'enader de la Lorraine, & se venir presenter à la Cour en cette ville de Paris: où il a vescu depuis le premier d'Auril iusques à ce iour 27. Iuillet d'emprunt, à credit, & en pension, chez vn sien amy, que Dieu a inspiré de l'assister en ceste extreme nécessité, le chef d'œuure de la conspiration de de Selue, des Maghins & consors.

34. En fin toutesfois la douce prouidence de ce bô Dieu à tellemēt fortifié le courage, & religieux dessein dudit Valladier Abbé qu'il a tât fait aupres de sa Saincteté, & de sa Maiesté, que depuis la S. Martin de l'annee passée 1619. mal-gré toutes tēpestes, & contrarietés, bien que spolié de tous ses biens, & absent de sa maison Abbatialle, depuis l'an 1615. le 4. Decembre iusques à maintenant, il a introduit des Peres reformez de la congregation de S. Vanne de l'Ordre de saint Benoist, en sadiete maison de saint Arnoul pour y seruir Dieu suiuant l'estroicte perfection de ladire regle, & ce fait insensiblement debouter, & sequestrer les susdits Moynes rebelles, qui y ont apporté tant de resistance que ledit Abbé a esté forcé, & contrainct pour les y porter doucement d'accorder sous le bon plaisir neantmoins de sa Saincteté, & du Roy, à chacun des quatres anciens des rentes fixes si exorbitantes & excessiues, que l'vn d'eux en iouyt pour plus de cinq refor-

mez, bien qu'ils se soient d'eux-mesmes exemptez de tout seruice & office: libertinage si esperduëment par eux, & si long temps, desiré: mais bien plus que cela: a esté contrainct & nécessité d'admettre au nombre des quatre vn cinquième en qualité de profès avec esgal appoinctement aux autres, bien qu'il ne fut ne le soit, & ne le puisse iamais estre, attainct, & preuenu, comme dict est, de crimes tres-enormes, & d'incapacité indispensable.

Attentats contre la vie, & personne dudit Valladier Abbé, de ses domestiques Officiers, subiets & amis, & derechef contre tous ses biens.

L'An 1615. le iour saint Martin vnzième Nouembre le demendeur enuoya à Marieuil sienne seigneurie du pays Messin, Hector le chef, son homme de chambre pour obuier aux desordres de la feste, le mesme iour proche la minuit y arriue vn foy disant soldat, qui se rend à la tauerne, enuoye querir les gens de iustice qui estoient couchez, s'aduouiant du sieur de Bonnourier: ledit le Cerf s'y achemine avec eux pour voir que c'est: & luy demande de la part du Seigneur à voir sa commission: mais le soldat au lieu de le faire, insolent prend le pot de dessus la table pour le ietter audict le Cerf, met la main à l'espee, & le poursuit pour l'offencer: mais le Cerf se retirant vers la porte pour euirer scandale, & n'ayant autres armes qu'un pistolet en main, chargé sans balle: le tire en l'air pour intimider le soldat: & se retire avec la iustice: estant veritable, & sans difficulté, qu'encore qu'il eut tué ledict soldat aggresseur, la seule cognoissance en appartenoit audict Valladier Abbé Seigneur Regalien dudit lieu, ainsi qu'il a esté préiugé du temps du feu Roy Henry le Grand, en semblable cas, & recogneu par les Sieurs Treze & maistre Escheuin de Mets. Neantmoins dès le lendemain Cornier commis Preuost y accourt avec ses Archers & spoliant la iustice dudit Abbé, informe Preuostablement: ne trouuant point de tesmoins à sa poste, contrainct à coups de bastons les vns & les autres à tesmoigner, & sur vne faulx & supposée information, condamne en fin ledit Hector le Cerf à auoir l'estrapade en peinture, le fait attacher en vn gibet au grand chāp

Passaille

passaille, vestu des couleurs dudit Abbé, qu'il n'auoit iamais porté, & en vint iusques là, qu'il voulut faire mesme donner l'estrapade au tableau, ou il auoit fait depeindre ledit le Cerf. Sur la nouuelle qu'eust le demandeur de cette information pretendue, il enuoye vn autre sien vallet Pierre le Roux pour faire euader le Cerf, & le soustraire à la violence de Cornier, comme il fit s'allant rendre hors du pays Messin à Bouldrecourt terre souueraine, ou il fut furieusement poursuiui par ledit Cornier, & ledit Pierre le Roux, on ne scait encore comment, chassé & poursuiui toute la nuit par le mesme en sorte, que le matin auant que les portes de Mets fussent ouuertes, il se trouua noyé & precipité dedans la Seille dans vn precipice tout proche de la porte des Allemands.

2 Ledit Cornier de despit de ce que le Maieur de la iustice dudit Marieuil nommé Benoist Guillaume, & Jean Poicellet maistre Escheuin, n'auoient voulu condescendre à sa supposee information, & croyant que ce fut ledit Benoist qui eut fait euader le cerf, l'enuoya querir avec ledit maistre Escheuin & les constitua prisonniers: autre supreme attentat de Iurisdiction; condamna le pauvre Maieur innocent, à payer tous les frais de la susdite procedure iusques à le ruiner: dont voicy toutes les pieces iustificatives, & la contraire & veritable information, faite iuridiquement par la Iustice du lieu, à la descharge dudit le Cerf: par laquelle paroist, qu'entre autres Cornier auoit supposé que ledit le Cerf auoit tiré le pistolet chargé à balle, & que les vestiges de la balle paroissoient à la cheminee, ce qui n'a iamais esté: conuaincu de faulseté à veuë d'œil: suppliant la Cour de prendre garde que le feu sieur Bonnourier declare Iuge competant ledit Cornier en cette action, bien que nullement Preuostable, & oppresse la iurisdiction de l'Abbé de saint Arnoul, contre les termes express des gardes Gardiènes du Roy.

Trois pieces
cotte ZZ.2.
informa-
tion.

30 Il estoit notoire à toute la ville de Mets que lors qu'on enuoya briser les portes de son Abbaye pour surprendre ledit demandeur par quatreuingts ou cent Sergens ou recors, le carrosse estoit prest pour l'enleuer en la conciergerie, & le suffoquer dedans vne caue funeste, que la cour y trouuera pleine de culbutes & de precipices, où abusans de leur pretendue souueraineté, ils ont accoustumé d'en faire mourir secrettement, & sans forme de Iustice: & se verifera que Maghin par plusieurs, & diuerses fois

s'est vanté mesme en pleine assemblee des trois ordres publiquement, que s'ils eussent tenu ledit Abbé, & s'ils le tenoyent encore n'oyroit iamais plus parler de luy, que s'il pouuoit l'attrapper, il n'eschapperoit iamais de ses mains, qu'il falloit le tuer, & à la premiere rencontre le mettre sur le carreau.

L'an 1616. 4 Ledit demandeur contraint par leurs conspirations de sortir
le 31. De. du pont Amousson arriué à Nancy se seruans de l'intelligence
cembre. qu'ils auoient, & ont tousiours eu iusques icy, avec son ennemy iuré, soy disant primat dudit Nancy deteneur de son prioré, de Lay arriué qu'il y fut le trête vniesme Decembre 1615. encore dans son carrosse, ledit Primat luy enuoye huit ou dix, avec les espees nuës, & les pistolets pour l'assassiner. Il se iette dedans la prochaine maisõ du sieur de Vingtemille Gouverneur pour lors de Monsieur le Prince de Vauldemont, & ferme trois ou quatre portes contre eux qu'ils brisent toutes, & le rencontrants à genoux deuant vn Crucifix attendant le coup de la mort, vestu de son habit Abbatial, Dieu suscita vn Gentilhomme François de la troupe nommé Beller, qui empescha qu'il ne fut tué, disant qu'on luy auoit fait à croire qu'on s'alloit battre avec vn Gentilhomme de la qualité, & que celuy qui tireroit à ce Prelat en mourroit de sa main: qui fut la cause que le conducteur de la troupe nepueu dudit Primat se contenta d'exceder, & faire rudement excéder ledit Abbé & sur le champ, de le traduire par les rues scandaleusement, iusques dans la maison & chambre dudit Primat son oncle, qui se cacha, & n'eut la hardiesse d'attendre l'aspect & le regard dudit Abbé. Acte si barbare que son Altesse en recepuant la plainte en pleura; commanda en estre sur le champ informé, ce qui fut fait tres-exactement, & plus de trente tesmoins ouys, & ledit demandeur visité par les Chirurgiens de son Altesse, mais tellement en fin importuné, qu'il fallut se contenter de la reparation, & satisfaction solemnelle, que luy en fit en presence de toute la Cour de Lorraine, dedans la Gallerie, ledit Nepueu du Primat.

L'an 1616.
Januier.

5 En ce mesme temps en Ianuier 1616. de Selue voyant son dessein de Nancy auoir manqué, se mit à informer fort & ferme contre le demandeur, lequel aduertý que Iacques Foës Doyen, son ennemy inueteré contreignoit ses Moynes, & ses vicaires des villages d'aller deposer contre luy pardeuant de Selue, & Maghin luy enuoya Prarlou son Aumosnier, Prestre, & Notaire Apo-

stolique avec des recors, pour s'en plaindre à luy, & protester contre luy d'attentat, de nullité, & des sacres Anathemes: mais au lieu d'en tirer raison, ledit Foës, bien que plus que Sexagenere, se iette furieusement sur ledit Aumosnier Prestre à coup de poing, & à coups de pieds, iusques à luy faire sang, luy disant que s'il tenoit Valladier il luy en feroit tout autant, & qu'il le falloit assommer. Deux mois apres renuoyant le mesme Praton Aumonier à Metz pour pouruoir à ses affaires maghin luy fit dire, que s'il s'y presentoit on l'enuoyroit en fonds de fosse, si que cōtraint de s'arrestier à Cheminot sienne seigneurie, on fait sortir les Archers, & Carabins contre luy, dont il fut tellement intimidé, qu'il en mourut d'effray en peu de iours.

6 Il y a information faicte, & prise de corps decernée dès l'an 1617. par les sieurs Hordal, & Mathys Docteurs es loix du Pontamousson, iuges du Bufet dudit demandeur, ctre Mangin Preuost son subiect de Cheminot pour auoir receu argent, avec promesse d'autre somme pour arquebuser ledict Maghin, s'il se presentoit au pays Messin.

*L'an 1626.
le 21. Iuillet.*

7 L'an 1616. le vingtiesme Iuillet de Selue, auant qu'entrer à Paris avec la deputation solennelle dont est parlé cy dessus, s'arreste trois, ou quatre iours à Claye, & à la mesme heure, & iour qu'il entre dans Paris, enuoye sur le demandeur vnze, ou douze espees nuës pour l'assassiner. Il estoit dans son carrosse seul avec son Aumosnier au faux-bourg, tout contre la porte sainct Germain, à la veüe du Louure, dedans la ville Royale: se iette par la portiere dedans vne boutique, & le peuple accourant les assassins crient qu'il venoit de manquer de tuer le Roy, & qu'il auoit fait des enfans à sa sœur, & autres abominables calomnies, dont ils n'ont iamais parlé que pour lors, & leur demãdant à dessein qui les auoit enuoyez, ils respondirent tout haut que c'estoit monsieur de Selue premier President de Metz: les seruiteurs du demandeur, avec quelques-vns des gardes se iettent sur eux, & les repoussent. Iacques Dompette Moyne, Bazoille, & Brahaut auantcoureurs des deputez porteurs des pretendus decrets de de Selue, par la faueur d'un certain Aduocat pour la susdite pension contre ledit Valladier, obtiennent pareatis du Lieutenant criminel son frere, & sous ce pretexte tiennent vn carrosse prest à six cheuaux pour le raur à leur caue funeste, bien que

Deux pie-
ces cote
XX. 2.

par deux arrests du Conseil toute cognoissance, & iurisdiction leur en eust esté interdite. La Roynie mere passant presque sur l'heure mesme, se plaignant d'un si celebre attentat, elle l'enuoye avec des gardes à monsieur le Garde des Seaux: & luy avec son homme de chambre à monsieur le Procureur General: le sieur Defunctis par son commandement en informe: de Selue est chargé par l'information de les auoir enuoyez: prise de corps est decernée contre Bazoille, & Brahaut conducteurs presents de la troupe & leurs complices: voicy le decret qu'on employe avec les informations sur ce faictes.

8 Partant de Paris avec ses derniers arrests du Roy accompagné de George de Ramezay des gardes Escossoises à la manche pour s'aller rendre à sa maison Abbatiale de Metz, il fut attaqué sur la nuit dans le bois d'Eytoges, & ne se garantit que sous l'espaisseur de la nuit, ses laquais qui estoient sur le derrier bien battus: & arriuant de là à Chaallon à la cense de Bellay, l'hoste voyant arriuer le demandeur avec son carrosse, & l'interrogeant s'il n'estoit pas Abbé de Mets, adiousta que sept ou huit soldats armez de carrabines & de pistolets, l'auoient attendu trois iours durant en sa maison, veillans toutes les nuits, & faisans guetter le grand chemin par l'un d'eux pour voir quand il passeroit: disans souuent entr'eux qu'il falloit tuer l'Abbé, & bien bleffer les autres: qu'ils auoient couché à Yaulbe la nuit deriere, sur l'autre grand chemin à demy lieue de là, & de faict ils y furent pris ceste matinee mesme comme volleurs, & vagabonds, par providence diuine par le frere du sieur gouuerneur de sainte Manehou ou le demandeur alla coucher le mesme iour: sans quoy il n'eust peu eschapper de leurs mains: & arriuant au pays Messin avec sa compagnie, & l'Archer des gardes, il trouua un bruit courant par toute la ville de Mets, & la Lorraine, que l'Abbé de saint Arnoul auoit esté tué au bois d'Eytoges, & ceux de sa compagnie bien bleffez.

9 Arriué en son Chasteau de Bouxiere au pays Messin, il ne manqua les Archers & Carrabins, que de demy heure, contraint de s'euader en Lorraine, & incontinent s'estant porté à Bouldrecour hors du pays Messin, Seigneurie sienne souveraine, & hors du gouvernement de Mets, le sieur Bonnouurier enuoya le sedit Bazoille conducteur des assassins de Paris, & cinq carrabins de la garnison, avec commandement de faire deffenses à ces subiects

iets de le recognoistre pour Abbé, & de luy payer aucune chose, & cependant faire main basse, & tuer ledit demandeur Abbé: lequel se trouuant le plus fort, porta encore ce respect audit Bonnourier de luy laisser aller sains & sauues ses Carrabins, faisant constituer prisonnier ledit Bazoille, auquel le proces fut incontinent fait & parfait: mais par extreme importunité dudit sieur Bonnourier, il fut instamment pressé par son Altesse de Lorraine, & par monsieur de Vauldemont de luy donner grace de la vie, apres qu'il luy eut fait reparation solemnelle, avec toutes les formes d'infamie, & luy eust demandé grace, qu'il luy accorda, à charge de ne se plus trouuer dans ses terres, sur peine d'estre pendu & estranglé, sans autre forme de proces.

*Trois pieces
cotte ZZ.
2. l'informa-
tion.*

10 En mesme temps ledit sieur Bonnourier, de Selue, & Maghin enuoyerent en garnison des soldats dans le chasteau de Bouxiere appartenant audit demandeur, & y autorisent vn sien subiect rebelle avec lesdits soldats, avec commandement expres de l'arquebuser sur le champ s'il s'y presentoit, prendre & amener prisonniers à Mets tous ceux qui y viendroient de sa part: si bien que y allant vne fois luy-mesme, luy sixiesme ou septiesme à cheual, son susdit subiect rebelle leur tira d'une tour, mais manqua son coup par prouidence diuine: & fut ladire maison ainsi occupee & detenue deux ans durant, & les reuenus d'icelle employez à nourrir, & payer les susdits soldats, ainsi qu'il appert par les comptes cy dessus produits: & pour le regard du subiect rebelle parent de Maghin, il y a information exactement faite par les sieurs Hordal & Matthis Docteurs es loix qu'on employe icy, d'où paroistront d'autres extremes rebellions, & conspirations contre la vie dudit demandeur.

*En payer
l'informa-
tion cotte.
C.*

11 Il enuoye l'an 1617. audit chasteau deux huissiers Royaux de Vaucouleur pour leur intimer les arrefts du Roy, & leur faire commandement de par le Roy de vider dudit Chasteau & de là s'acheminer à Mets pour redoubler la mesme signification au sieur Bonnourier, à de Selue & Maghin: mais au lieu d'obeyr, lesdits soldats, & le subiect rebelle detiennent prisonniers dedans le chasteau lesdits Huissiers iusques à ce qu'ils eurent sceu d'eux, auoir charge d'aller faire le mesme commandement audit Bonnourier, qu'ils les relascherent le lendemain: lesquels huissiers paruenus aux portes de la ville de Metz, les trouuerent fermées, à

*Deux pie-
ces cotte
C. 2.*

cause que ledit sieur Bonnourier estoit tombé en vne symcope dont il mourut fort soudainement.

12 En mesme temps parce que Nicolas Ferron, que de Selue auoit depossédé de la charge de Recepueur, estoit venu à Nancy pour rendre compte de ce qu'il auoit receu audit demandeur; incontinent qu'il fut de retour à Metz, Maghin transporté de passion l'enuoye en estroite prison, où il fut plus de vingt iours sans voir ny parler à personne, avec toute sorte de rigueur, & d'adepuis relasché sans autre formalité.

13 Parce que il auoit escript à Nicolas Guillaume, l'un de ses fermiers en ses termes: *Courage, bonnes nouvelles, nostre maistre des Requestes vient, le Roy y mettra bon ordre, &c.* De Selue & Maghin aduertis de ceste lettre enuoyerent des Archers en la maison dudit Guillaume, bien que hors de leur iurisdiction, & hors du pays Messin, font enleuer tous ses papiers: l'enuoyent comme vn voleur en prison, ou il fut encore plus de vingt iours traité avec toute sorte de rudesse.

14 Ils en font de mesme à Charles Barrer, vn autre de ses fermiers qu'ils ont emprisonné deux ou trois fois iusques à le ruiner, pour auoir obey au Roy, & n'auoir voulu rebeller cōtre son Seigneur: de mesme à tous ceux de ses iustices de Cheminot, de Vigy, & de Flauigny qui s'en plaindront tous en temps & lieu. Mais singulierement parce que son Maieur & Chastellain de Bouxiere, Mangin, Euerard s'estoit tousiours tenu en l'obeyssance du Roy & de son Seigneur, non contents de l'auoir inhumainement traité & emprisonné, Cornier Preuost luy enuoya vn de ses Archers nommé Robert, l'un de ceux qui auoit gardé le Chasteau, qui l'exceda tellement à coups de bastons, qu'il le laissa sur la place pour mort & estropié.

15 Le mesme Cornier non content d'auoir pillé & rauagé toutes les terres, & les subiects dudit demandeur hayssant vn sien subiect à mort, nommé Collignon Hilayre à cause de la fidelité qu'il auoit tesmoigné à son Maistre, apres l'auoir bastonné deux ou trois fois excessiuement, & emprisonné autant de fois, iusques à luy porter contre le cœur, & contre les deux yeux vne fourchette de fer, en luy disant qu'en despit de Valladier, il vouloit luy creuer le cœur & les deux yeux, ledit Collignon s'en estant allé à la haute Pierre pour se plaindre à monsieur le Marquis de la Valler-

te de tant de cruautez, ledit Cornier le rencontrant à la porte du logis dudit sieur Marquis, empoignant vn gros batton, le brisa & luy fit sang de toutes parts, & tout ce qu'il peut faire, fut de ce faire presenter en cet estat audit sieur Marquis qui en eut horreur, & commanda sur le champ qu'on luy en fist exacte iustice: mais ledit Cornier le menassa tellement de le tuer, & fit en sorte que le pauvre Innocent n'en eust rien que cela: mesme vne fois qu'il estoit en prison sa femme s'estant allé ietter aux pieds dudit Cornier qui estoit en sa maison sur vne chaire languissant & demy-mort, le priant d'auoir pitié de son mary & de ses enfans, il en entra en telle furie, qu'il luy ietta contre la teste vn baston, avec tant de rudesse, que luy-mesme en tumba de sa chaire sur la place sans luy en faire autre raison, que de luy dire qu'il estoit vallet de Valladier & qu'il le feroit pendre.

16 L'an 1619. au mois de Iuin ledit demandeur enuoyant à Mariueil sienne seigneurie Messire Jean Balthasar Prestre, son Aumosnier avec vn autre siẽ seruiteur domestique pour faire encherir quelques foings, ils furent incontinent saisis & liez par le susdict Robert Archer de Cornier, & les subiects à coups de baston contraincts à l'asister, & de là conduits scandaleusement à Mets en prison, le seruiteur à la Concirgerie de la maison de ville, & l'Aumosnier dedans la propre chambre Abbatiale que les Moines cadenaßerẽt, & conuertirent en prison, en quel estat ils furent l'espace d'vn mois avec toute sorte de mauuais traictement.

17 Vn Procureur nommé L'arminag soupçonné de donner des aduis audit demandeur, & de sçauoir de ses secrets desseins fut enleué par Maghin, & mis en basse fosse, ou il fut plus de trois iours, sans boire ny sans manger, & du depuis traicté avec toute sorte de rigueur.

18 Parce que le sieur de Hem Abbé du Pontifroy del'Ordre de Cisteaux, & le sieur de la Roche Chanoine François estoiet amis particuliers dudit demandeur, ils leur susciterent des querelles d'Allemand, mais criminelles, les contraignants de quitter la ville, en sorte qu'il leur en a cousté la vie à tous deux: & fera paroistre à la Cour notoiremẽt, qu'il ne s'est trouué personne de quelque qualité qu'il fust en la ville de Mets, qui ayt tesmoigné quelque bonne volonté audit demandeur, ou mesme parle en bien de luy, que de Selue, & Maghin ne les ayent persecutez à outran-


ce, avec toute sorte d'inhumanité.

19. Monsieur d'Espernon en fin de retour à Mets au mois de Juillet 1618. trouue tant de plainctes, & de clameurs contre de Selue, & Maghin, qu'il est contrainct de commander leur estre fait, & parfait leur procez singulierement à Maghin, qui se trouue attainct entr'autres d'auoir atrocement mesdit du Roy, abbatu, & brisé les armes de France, & les fleurs delys qui estoient sur les fontaines publiques en despit de ce que sa Maiesté auoit donné tant d'arrests en faueur dudit demandeur: & se prouuera que ledit Maghin a reiteré, & à mesme occasion les mesmes iniures en pleine assemblee d'Estat: si que deslors mondit sieur d'Espernon le degrada, luy osta l'espee du costé, fit abbatre ses armes qu'il auoit plantées par la ville, fit ietter dedans le feu les mandemens restans de grandes sommes donnees à son fils sur la bourse publique pour les voyages qu'il auoit faits à Paris contre ledict demandeur: mais lesdicts maghins, & de Selue se sentans accablez de iustes accusations, & maluersations quittent la ville de Mets, de Selue se va rendre à Toul, & du depuis icy à Paris, se deffait de sa charge comme dict est, de peur de ne la perdre, entre les mains du sieur Charpentier: & Maghin pour eluder les supplices par luy encourus, vient chercher faueur à la Cour pour y faire euoquer son procez, & ce sont ces deux, de Selue, & Maghin ennemys iurez iusques là del'autorité du Roy en la ville de Mets: lesquels se voyants pris par iuste iugement du Ciel, commencent à changer de notte, à faire des bons valets, & à contrefaire les zelez seruiteurs du Roy, & sous ce pretexte en tirēt mesme des pēsons, voire chose deplorable, baillans par deça leurs propres interests pour des interests de sa Maiesté, deçoypuēt plusieurs des ministres de l'Estat, pour garâtir leur vie, & abolir leurs rebellions passées par leur beau semblât de seruiteurs de Roy, qu'ils ne fūrēt iamais, ainsi qu'il apert par tout ce que dessus. Pour le sieur Bônourier, il se trouua mort à l'arriuee de monsieur d'Espernon: le procez se fait, & pat fait maintenant extraordinairement au grand Conseil à Cornier, sous le nombre incroyable des commissions, par luy perpetrees, & sa charge cependât exercee par son Lieutenant sa partie principale. Bazoille, Robert l'Archer, & les deux Huissiers Emissaires des passions des maghins, & de Selue morts de morts extraordinaires, & six de ceux qui attaquèrent le demandeur à Nancy,

Nancy, morte de mort violente & sanglante. Et semble que le ciel ayt desia preiugé & prononcé en ceste cause, par plusieurs autres estranges & tragiques euenements qui en sont arriuez, desquels les auteurs de la tragedie, & les trois ordres de Metz, soyent re-els, soyent imaginaires, n'ont esté exempts iusques icy: que le demandeur passe sous silence, les laissant à considerer à la prudence de la Cour.

19 En ce mesme temps du retour de monsieur d'Espernon à Mets le demandeur dresse vn factum qu'il luy presente, narratif de tout le contenu en ce present Inuentaie: lequel factum, ledits de Selue & Maghin & consorts prennent pour libelle diffamatoire, & pour parer, à ce coup que leurs violences & rebellions en pouuoient recepuoir; à force de faueur, sans ouyr parties, mesme sans en rien faire sçauoir ny signifier audit demandeur, extorquent subreptissement vn arrest au conseil du Roy, par lequel ledit factum est nommé Libelle diffamatoire, & ordonné qu'il sera informé de l'auteur: & sur ce autre arrest audit Conseil à la Requeste dudit de Selue, des Maghins, de la vesue, & heritier du feu sieur Bonnouurier tendans à reparation d'iniure renuoyé en la Cour. De Selue sur tout pour faire du bon vallet, & du zelé seruiteur de Roy, treuue dedàs ledit factum, le dict & publie par tout, l'imprime & le presente à la Cour, que ledit Valladier à voulu oster la Couronne Royale de la teste de nos Rois, pour la mettre sur la teste de monsieur de Vaudemont, & partant qu'il est criminel de leze Maiesté, punissable &c. voicy donc le fait. Ledit Valladier donnant les raisons pourquoy necessité par ledit de Selue & ses consors, il auroit fait son coadiuteur en son Abbaye par forme d'acces le fils de monsieur de Vauldemôt, entre autres en apporte cette raison sans y changer vne seule syllabe.

C'est parce que ie n'ay rien traitté ny fait que sous le bon plaisir, & volonté de sa Majesté: parce que ie n'ay peu en tout le Royaume, APRES LES PRINCES DV SANG, *faire choix d'un plus grand Prince ny plus proche parent de la maison du Roy, que monseigneur de Vaudemont petit fils de Henry second, propre & germain nepueu des Rois Charles neufiesme, & Henry troisieme, & de la Royne*



Marguerite: descendu en droicte ligne masculine, & feminine avec nos Rois de S. Arnoul, de Charlemaigne, & autres Princes fondateurs de mon Abbaye.

Sur quoy voicy le Haro, & la gloze extraordinaire imprimée de de Selue en vn certain petit Calepin qu'il a imprimé des principales phrases contenues dedans le susdict factum.

Et pour le regard de ce qu'il dict en la page 153. que Monsieur de Vaudemont est descendu en droicte ligne Masculine, & Feminine avec nos Rois, de saint Arnoul, de Charlemaigne, & autres Princes fondateurs de son Abbaye: C'est à Messieurs les gés du Roy à remarquer l'atrocité de ce crime de leze-Maiesté, & en poursuivre la iustice, affin d'oster l'impression qu'il a voulu donner à vn chacun contraire à l'Estat, & punissable, quelque explication qu'il veuille, & puisse donner, d'autant que l'ambiguité est imprimée & diuulgée, & l'explication n'est qu'une escriture prunée, & particuliere. Ce sont les mesmes parolles de de Selue.

20 Imposture si atroce qu'elle excède tout ce que ledit demandeur pourroit iamais auoir escrit, ou escrire à l'aduenir contre le dict de Selue, quand bien il y employeroit toutes les Catilinaires Vatinienes, Verrines, & Philippiques, tant Grecques que Latines, de l'antiquité. La passion l'a tellement aueuglé qu'il n'a pas pris garde qu'en la periode qu'il repréd de crime de leze-Maiesté, l'auteur a mis le sieur Côte de Vaudemont, hors de la ligne des Princes du sang par termes expres. Secondement que le sens que de Selue donne à ces mots: *ysu en droitte ligne masculine & feminine, avec nos Rois de S. Arnoul Charlemaigne &c.* est impossible, d'autant que si separément il entend qu'il ayt voulu faire descendre en ligne droitte Masculine ledit sieur Comte de Vaudemont de Charlemaigne, outre que cela seroit contraire à ce qu'il auoit dit, qu'il n'est pas Prince du sang, il faudroit que toutes les femmes des Rois deuanciers de Madame Claude de Valois, mere du sieur Comte de Vaudemont, & fille de Henry second, fussent yssues en droitte ligne de Charlemaigne & de S. Arnoul, qui est l'impossibilité mesme: & qui ne s'est iamais veu en aucune race du monde, excepté parmy les Iuifs en l'ancienne loy, qui estoient obligez de prendre des femmes de la mesme tribu & lignee, pour ne confondre les tribus. Infamie que de Selue a voulu imposer à la race Royale de cette loy Iuifue & marranesque. Tiercement d'oc

que ces mots yssus en droitte ligne masculine & feminine de *S. Arnoul Charlemagne &c.* ne se peuuent entendre dudit sieur Comte de Vauldemont que conioinctement & collectiuelement, à sçauoir qu'il en est issu en ligne masculine, mais interrompue par tant & tant de fois par la feminine: estant indubitable qu'il n'est yssu de la maison de Bourbon, que par Renée de Bourbon sa bisayeulle, & par Claude de Valois sa mere, de la maison des Valois; & quand à la race Ducalle mesme yssue de Saint Clodulphe puisné de saint Arnoul, petit fils en droitte ligne de Clodio le Cheuelu, elle a esté interrôpue quatre fois par la ligne feminine, assauoir par *Bone, Itte, Ysabeau, & Yoland d'Anjou*. En quatriesme lieu donc que tant s'en faut que l'auteur ayt offensé la maison Royale qu'il l'a dignement seruie, laissant le priuilege à nostre grand Roy d'estre yssu en droitte ligne purement Masculine, des trois races Royales, depuis Pharamond, sans vne seule interruption feminine: & partant d'estre de l'extraction la plus ancienne, qu'aucun Roy qui ayt esté iamais au monde: toutes lesquelles susdittes choses, ledit demandeur a fait voir à l'œil en vne Genealogie generale, & exacte de nos Roys, ainsi qu'il l'auoit desia fait voir, & imprimer en son Auguste Basilique dès l'an 1614.

21 Maistre Lazare de Selue, les Maghins, & conforts reprenants haleine, de la retraicte ineuitable du demandeur en Lorraine, ou ils l'auoiēt necessité se retirer, taschent premierement de ioindre à leur passion de nouveau pour sauuer les frais, & le combattre à credit, les trois Ordres de Mets pour le poursuiure en reparation d'honneur, sur le subiect dudit *factum* pardeuant vous en la deuxieme chambre: les trois Ordres s'y laissent insensiblement engager pour quelque temps, ainsi qu'il appert par leurs pieces cy dessus produictes: mais bien-tost apres, ayants descouuert leur piperie, s'en retirent. Et voicy les malicieux artifices, dont ledit de Selue se seruit pour surprendre la sincerité, & religion de la Cour. Ayant tousiours fait semblant d'y contraindre à respondre ledit demandeur, il n'a laissé aucun moyen en arriere pour le luy rendre impossible, & luy en boucler toutes les auenuës, suppliant tres-humblement la Cour d'y prendre garde, & y auoir esgard. 1. Ledit Valladiet demandeur au premier aduis qu'il eust, que ledit de Selue, & conforts l'attaquoient pardeuant vous, il se mit en chemin en compagnie de monsieur de Vaudemort pour la

seureté de sa persône, & pour le venir poursuiure l'an 1618. le 21. de Nouëbre: mais arriué qu'il fut à Toul par conspiratiō dudiēt de Selue, on vſa de tous moyens pour rompre son voyage: le ſieur de Vanne y commandant pour le Roy l'asſeura, & mondit ſieur de Vaudemont auſſi qu'il auoit eū lettres de la part de de Selue, que dēſlors il y auoit priſe de corps contre ledit demandeur, avec vn *Retentum curiæ* au Parlement, pour le malmener, ſur quoy ils le preſſerent de s'en retourner, mais il n'y voulut entendre, bien qu'ō luy redoubla les meſmes alarmes, arriué qu'il fut à Barleduc, à Chaalon, & à Claye, où ledit ſieur Côte de Vaudemont, preſſé de pluſieurs ſemblables aduis, le voyant obſtiné a paracheuer le voyage, luy perſuada d'entrer cachettement à Paris, luy offrāt le loger en lieu ſecret, & duquel perſonne ne ſçauroit rien: de quoy ne tenant conte lediēt demandeur, entra avec lediēt ſieur Comte publiquemēt à Paris & le fit loger par ſon Fourrier chez l'Oyſelleur du Roy ruē ſainēt Anthoine. 2. Ledit de Selue faiēt iouer vn autre reſſort pour l'intimider. Deux iours apres ſon arriuee à Paris, il faiēt dire à mondiēt ſieur de Vaudemont par vn Secretaire d'Eſtat que le Roy trouuoit fort mauuais qu'il eut permis ledit Valladier venir à Paris en ſa compagnie: & que ſon ſeul reſpect eſtoit cauſe qu'on ne l'auoit deſia ſaiſi, & coſſré: ce que lediēt ſieur Comte de Vaudemōt luy enuoya incōtinent dire par le ſieur de Mirecour ſon Agent, & le luy asſeura luy-meſme le lendemain: & biē qu'il y euſt de la crainte aſſez, *cadens in conſtanti virum*, ſi eſt-ce que le demandeur ne fit que s'en mocquer: s'en alla ſur le champ trouuer monſieur le garde des Seaux qui luy diēt qu'il ne croyoit pas que cela fuſt: pria le ſieur de ſainēt Germain Predicateur du Roy, d'ē ſçauoir des nouuelles de mōſieur Seruin, qui l'asſeura cela n'eſtre pas: ce qui le fit reſoudre d'aller luy meſme dēſlors ſe preſenter à monſieur le Procureur general du Roy pour commencer ſes pourſuittes contre ledit de Selue, & ſes conſorts: mais à l'heure meſme qu'il montoit à cheual pour y aller, voicy encore des nouuelles de la part de monſieur de Vaudemōt, du ſieur Comte de Marcouſſé Intendant de ſa maiſon & du ſieur Paſſauant ſon Lieutenant à Verdun, tous deux amis du demandeur, l'asſeurants que dedans deux heures il deuoit eſtre pris au corps par dix, ou vnze Huifſiers, ou Sergents: qui fut la cauſe que rompant ſon deſſein, il alla trouuer lediēt ſieur Comte de Vaudemont

demonst pour le sonder plus auant, qui le pressa finalement de partir: adioustant n'estre en son pouuoir de le secourir ny le garantir: si bien que voyant trop clairement, que s'il n'y auoit du mal il y auoit de la conspiration: il partit abruptement, & sur le châp, sans dire a dieu à personne qu'audit sieur Comte de Vaudemôt. Voila comme de Selue eluda son voyage, & qui ne manquoit iamais de se trouuer tous les iours au leuer dudit sieur Comte, avec Maghin son Collateral.

22 Se voyant ledit de Selue par ce moyen les toutes franches, il reprend ses esprits, poursuit fort & ferme le demandeur: & par nouueaux artifices, luy rend encore toutes defenses impossibles. 1 De prim saut pour luy oster les moyens de viure, & de venir se defendre: precipitamment sans adiournement personnel, supposant ledict demandeur estre appellant de ses procedures, contre les termes expres de l'arrest de renuoy donné au Conseil, & contre la verité: supposant aussi contre la teneur du mesme arrest, que ledit demandeur estoit tenu de se rendre prisonnier en la Conciergerie du Palais, là où au contraire il est porté par ledict Arrest de renuoy fondamental de toute ceste affaire, que les pretendus decretz dudit de Selue seront surcis, & que ledict demandeur seroit seulement tenu d'y venir plaider & ester à droict: neâtmoins sur telle supposition pour surprendre la Cour, sans adiournemēt cōme dit est, il prend vn congé pour se couuoir avec vn mal appelé, & sans grief, & incontinent vn decret par contumace, avec annotation, & saisie de tous ses biens. 2. Quoy nōobstant de Selue aduertty par ses espions, que le demandeur se mettoit en chemin pour venir obuier audit Arrest, il suborne son Aduocat, par lequel il fait escrire au demandeur de se bien garder de venir se presenter à la Cour, ny pour demāder renuoy, ny autrement: qu'il y auoit vn *Retentum curie*, &c. & en fin il est infallible qu'ayant laissé procuration expresse à sondict Aduocat dès l'an 1618. en Decembre, de poursuiure viuement ledict de Selue, & ses consors, mesme eslisant domicile chez luy, ledit Aduocat a tellemēt preuariqué avec ledict de Selue, que de deux ans durant, il n'a pas fait vn seul pas pour ladicte affaire, ny vn seul acte de deuoir: luy a communiqué toutes ses lettres secrettes, à supprimé toutes ses pieces iustificatiues, & finalement la laissé contumacer, dont voicy dix pieces iustificatiues de ladicte preua-

rication, outre le procez que ledit demandeur a intenté contre le dict Aduocat preuaricateur aux Requestes de l'Hostel prest à iuger, au rapport de monsieur Grangier qu'il employe. 3. Bien plus bien que denué de tous moyens ledit demandeur apres auoir descouuert la preuarication de sondit Aduocat, resolu de se venir presenter à la Cour, ledit de Selue frauduleusement luy faict parler d'accord, pour l'amuser & l'endormir, par plusieurs personnes qualifiees, singulierement par le sieur Comte de Vaudemont, le sieur du Meuil Massé, & le sieur Gillot Lieutenant dudit de Selue en la ville de Toul: iusques là que ledit sieur Comte de Vaudemont se seroit daigné des'y entremettre, & d'y porter ledit demandeur: mesme à cet effet auroit enuoyé procuration au sieur du Ruissieu aduocat du Roy aux Requestes de l'hostel: mais pèdant ledit temps, & la procuration desia deliuree audit sieur du Ruissieu, ledit de Selue malicieusement haste vn decret de prise de corps qu'il enuoye promptement en Lorraine, & qu'il faict iotier si secrettement, que mesme au desceu dudit demandeur, & sans qu'il pensa à rien moins, il obtint vn pareatis de son Altesse de Lorraine, pour executer ledit decret, où ledit demandeur pensoit estre en toute assurance, non seulement pour le signalé seruice qu'il leur auoit faict, mais bien plus sous le droit commun des gens, & des loix de toutes les nations, par lesquelles au rapport de Philon le Iuif, les bestes faufues mesme chassées, & couruës par les veneurs se refugians à la basse cour, ou au domaine de qui que ce fust, auoient droit d'hospitalité, & y estoient saintement, & religieusement sauuegardees: & la Chasse passée mises en liberté. Si fut ledit demandeur tellement surpris par ledict decret & pareatis, que luy estant d'vne part detenu par ledict sieur Comte de Vaudemont toute sorte d'aliment, & de l'autre estant chassé, & couru par vn decret, & vn pareatis inopé, s'euadant avec sept pistolles seulement, qu'il emprunta sur le champ: il ne manqua que de demy-heure, douze, ou treize Archers, ou Sergens, sous la conduicte de Nicolas Maghin son capital ennemy, confort de de Selue, le 21. Mars iour saint Benoit, & le iour mesme qu'il auoit euté Marchal Lieutenant de Preuost, avec ses Archers, expulsé par Bonnouurier du pays Messin, & de sa maison Abbatiale. 4. Le demandeur donc accourt aux pieds de la Cour, où il trouue autant de Peres, & d'Oracles diuins que de Iuges, qui le

reçoivent tres-religieusement, & preiugeants desia par inspiration diuine, qui les guide, les susdictes surprises, & violences, relaschent sainctement de la rigueur de leurs formalitez, oyent le demandeur, & le regardent d'un œil fauorablement equitable: leuent incontinent les saisies, & annotations de ses biens: & le reçoivent à profonder pardeuant ce throsne Sacrosainct de l'aymable fleur delys, certe grande, & atroce, & non ouye persecution, contre ledit de Selue, les Maghins, & consorts defendeurs.

TOUT CONSIDERÉ Nosseigneurs, il vous plaise recepuoir l'exposant à persister & conclure en la rescision, & cassation de toutes les procedures des iugements susdits desdits de Selue, Maghin, des Treize & autres en ladite ville de Metz, & en la demande qu'il a cy deuant faite, & fait encore entant que besoin sera, contre lesdits de Selue, Maghins, Ioly, vefue, & heritiers du feu sieur Bonnouurier, qui sont interuenus en la cause, à ce qu'ils soient condamnez solidairement en tous ses despens, dommages & interets, mesme à la restitution de tous les fruiets, & reuenus de son Abbaye, & de tous les meubles qui ont esté pris & emportez, avec reparation d'honneur condigne, & selon la qualité de l'exposant: & parce qu'ils y concourent diuers attentats, & crimes enormes, dignes de la vindicte publique, requerant ledit exposant en ce qu'il le touche, l'adionction de monsieur le Procureur General du Roy, & s'en remettant pour le reste à son equité, que le proces soit fait & parfait audit de Selue, les Maghins, Ioly, Grandlambe, & leurs consors, ainsi que de raison: le tout nonobstant, & sans vous arrester audit arrest du dernier Aoust 1619. qu'il vous plaira mettre au neant, & tenir comme non aduenu: & les parties par vous mises en tel estat, qu'elles estoient auparavant iceluy: & au surplus leur estre fait bonne, & briefue Iustice.

FIN.



